

# *IMIFANEKISO YAKHRISTU*

 Lobo bumnandzi lobukhulu bakho, kusho loko.

Ngijabule kakhulu kuba sendlini yeNkhosi. Kunayinye kuphela indzawo lencono, futsi leyo kuba neNkhosi. Akunjalo na? Uma ku... Bonkhe bumatima netivivinyo netinkhatsato tekuphila tiyabhicana tingene kulelikhulu, likusasa lelikhatimulako. Futsi ngalokucinisekile sibheke sikhatsi lesitako kutsi lapho sitoMbona khona.

<sup>2</sup> Futsi lomunye bekangibuta, ngalelelinye lilanga, watsi, “Uyacabanga yini, Mnaketfu Branham, kutsi kuBuya kweNkhosi sekusedvute?”

Ngatsi, “Impela ngiyacabanga.”

Watsi, “Yebo-ke, ngikuve sikhatsi lesidze.”

<sup>3</sup> “Kodvwa,” ngatsi, “ngalelelinye lilanga uyokuva kwekugcina loko.” Niyabona na? Kunjalo, ngoba U—Utofika ngelinye lilanga. Futsi noma kunini, ngifuna kulungela nje. Ngi... loko ku...

<sup>4</sup> Besikhuluma, ngalelelinye lilanga, embikwalabanye bosomabhzinisi, lebebabameli, nalokunye nalokunye. Futsi—futsi batsi... Lomunye watsi, “Nguyiphi inhoso yakho—yakho lemcoka emphilweni?”

Ngatsi, “Nginayinye.”

Watsi, “Ngabe yini leyo?”

<sup>5</sup> Ngatsi, “Kusindzisa imiphefumulo ngentele Khristu.” Loko ngu—nguyonantfo kuphela leyo lengi...

<sup>6</sup> Impifikophelo yami lephakeme kunato tonkhe, nanemphokophelo lekuphela kwayo, kubona Jesu Khristu akhatimulisiwe. Ngiphilela loko.

<sup>7</sup> Futsi ngijabule kakhulu, bufakazi betfu, kutsi iminyaka lengemashumi lamatsatfu nakunye iyakhiwa manje, ngiMkhonte ngekutfobeka. Uma ngifanele ngiphile iminyaka letigidzi, benginekwekuphila lokungako kutsi ngikuphile, bengiyofuna kuphilela Yena wonkhe umzuzu wako. Ngoba mine... Futsi uma bengati kutsi bengiyokwaliwa ekugcineni, kuyinhlanhla lenkhulu kuphilela Yena! Uphatseka impela futsi muhle kakhulu!

<sup>8</sup> Futsi angikaze ngitfole lutfo, kuto tonkhe tindlela tami tekuphila, kutsi bekungacatsanisa noma ngayiphi indlela nenhanganyelo lesinayo ndzawonye uma sisodvwa, Yena nami. Abukho buddelwano lobumnandzi kakhudlwana lobendlula lobo. Kukhulu kwendlula lutsandvo lwanoma yini, lwankhosikati, bantfwana, nanoma yini, lutsandvo lwaKhristu. Luhle kakhulu.

<sup>9</sup> Manje, sijabule kakhulu kubona lemvuselelo ichubeka liviki lonkhe. Futsi seva loko uMnaketfu Parnell, kanye nalabanye, lebekenta kukhuluma lokukhulu lapha. Futsi siyetsema kutsi ngesikhatsi salemvuselelo lena . . .

<sup>10</sup> Imvuselelo ngaletinye tikhatsi ayicondzisiswa. Lomunye ucabanga kutsi imvuselelo ikungenisa emalunga lamasha ebandleni. Cha. Imiphumela yemvuselelo nguleyo. Kodvwa imvuselelo ikuvuselela loko lokuvele kusebandleni. Niyabona na? Yeku—yekuletsa loko.

<sup>11</sup> Kwake kwabakhona sikhatsi lapho ngema khona ngaselugwini lwelwandle, futsi ngi—ngiyacabanga ngikucaphune tikhatsi letinengi, kodywa ku . . . kwakungukadzeni, eminyakeni leyendlulile. Futsi kwakukwekulala la ngake ngabona khona, yebo-ke, kwakungesilo lwandle, kwakuyi Lake Michigan. Hope nami sasisenhlala lapho ngesikhatsi iNgungcuthela yeMhlaba yayikhona lapho. Loko kwakuku, ngiyakholwa, cishe nga 1922, Mnaketfu Egan, lokuncono kunako konkhe lengikukhumbulako, ngesikhatsi iNgungcuthela yeMhlaba yayise—seChicago. Kwakukwekulala kubona umtimba lomkhulu wemanti. Futsi ngema ngephandle lapho ngalolosuku, futsi ngibone lawo magagasi lamakhulu. Kufana nje ne . . . Ekuseni kweliPhasika, bebanenkonzo yekuphuma kwelilanga ngephandle lapho. Futsi kubona lawo magagasi lamakhulu angena futsi aphuma, futsi, o, abukeka kungatsi bekajabule kakhulu.

<sup>12</sup> Kodywa kwenteka ngocabanga, “Uyati, akasekho emanti kulelo chibi, futsi kuchubeka kanjalo, kunaleliba ngiko lapho lithule ngalokuphelele. Ngumtsamo lofanako wemanti, hhayi litfonsi linye ngetulu.” Kodvwa ngocabanga, “Yebo-ke, kungani i—imimoya yehla futsi—futsi inyakatise lichibi kanjalo na?” Kukwenta yonkhe idodi iphume kulelichibi. Niyabona na? Iphonsa yonkhe intfo elugwini. Lapho . . .

<sup>13</sup> Futsi—ke ngiyacabanga, “Loko kufana nelichibi linemvuselelo.” Niyabona na? Kuyalinyakatisa, futsi kuligcumise, futsi kulidlukutise ndzawotonkhe, ize yonkhe inkhukhuma iphume. Nguleyondlela nje imvuselelo lengayo, ikusivumela kutsi singene eMoyeni weNkhsosi, futsi sitfokote, futsi sente tintfo lettingakalungi tilunge, nekuhamba ngalokusondzele, nekutinikela kabusha, nekutinikela, tize tonkhe tintfo nekungabata kwelive konkhe kulahlelwne ngephandle elusentseni, niyabona. Khona—ke kulungile, kusebenta ngalokucacile, kusukela ngaleso sikhatsi kuya embili, lapho umkhumbi lomdzala wemphilo ucalalutamatama kulo. O, awudzingi kutsi ubukisise kakhulu, ngoba yonkhe intfo iphumile endleleni. Loko kuhle.

<sup>14</sup> Yebo—ke, kusihlwa, asifuni kugcina sikhatsi lesidze kakhulu, njengoba kunguMsombuluko ebusuku, nebusuku bekucala

beliviki, ebusukwini betfu bemvuselelo. Futsi ngangijabula kakhulu kumemetela kutsi imvuselelo iyachubeka.

<sup>15</sup> Futsi nginebangani labanengi. Ngibona labanye bazalwane lapha, nebafo labake banginika emaphupho labaphuphe ngawo, emavikini lambalwa lendlulile. Futsi iNkhosi ingisitile kutsi ngibe nekuhunyushwa kwaleto tintfo manje. Angati kutsi ngubani losemkhatsini wetfu, nekutsi tingakhi tihambi, noma ngukuphi lokunye. Kodvwa iNkhosi Nkulunkulu isasinika kuhunyushwa kwemaphupho. Futsi acondze ngco futsi aphelele.

<sup>16</sup> Futsi UnguNkulunkulu lofanako lobekanguye etinsukwini taJosefa, ngesikhatsi—ngesikhatsi inkhosipuphe emaphupho. Futsi wayihumushela, futsi bekaondze ngco. Futsi lamanye alawo maphupho ngisho nanamuha asesekhona. Imiphumela yawo isachubeka. Futsi, Danyela, ngetinsuku taNebukhadinezari.

<sup>17</sup> Futsi wetfu lokhatimulako, lomncane, umfundisi wetfu lotfobekile utsite, emizuzwaneni lembalwa leyendlulile, yebo-ke, abe—abengafuni nje kungicela kutsi ngisite lokunye futsi kuleliviki. Utsite, “Ngiyati kutsi ukhatsele, Mnaketfu Branham. Kodvwa,” watsi, “yebo-ke,” watsi, “silindzile nje futsi siyatibuta.” Loko kukahle.

<sup>18</sup> Empeleni, kudzingeke ngiwucitse umhlangano eSydney, e-Australia, ngenca yekutsi bebangeke bangivumele kubane-visa ngalesikhatsi, niyabona, kusuka eStates ngalesikhatsi lesi. Futsi, ngako-ke, naletinye tintfo, ngako-ke angikwati kuhamba khona manje kulesikhatsi. Angati kutsi ngitokhona nini kuhamba. Kodvwa ngekushesha ngitokhona. Kodvwa ngesikhatsi sidzingeka kukubeka emuva kancane, ngiya eChicago manje, e-emhlanganweni eChicago, lotako. Lokukutsi, babeke tikhangiso kutsi bengitoba lapho, kodvwa mine ngingati. Sikhatsi lebengifanele ngibe lapho ngaso, bengitofanele ngibe seFiji Isles, lapho batsi kuyoba khona bantfu labanengi lababutsene, futsi, etichingini. Kodvwa ngeke ngikhone kutsatsa umhlangano khona manje nje, lapho, ngenca yemalungelo e-visa. Futsi, kodvwa, ngitokwenta, madvutane. Balindzile nje.

<sup>19</sup> Manje ngitoba seChicago. Gene, uyati kutsi kukutiphi tinsuku loko? Ngabe ukhona lowatiko kutsi loko kwakhangiselelw linini? Angati ngisho nekutsi kwakukunini. Ngisanda kukubona ku*The Herald Of Faith*. Ngikholelw kutsi icala 4 noma 5 enyangeni, noma intfo lenjalo. Noma, ngulelandzelako, cishe liviki kusukela manje, tinsuku letilishumi. Futsi ngako-ke bengingaphansi kwebumatima lobunengi, futsi ngifisa imikhuleko yenu.

<sup>20</sup> Manje, kusihlwa, ngikhetsi kufundywa kwemBhalo lotsite, uma ningatsanza kufundza nami, lokuvela kuJohane loNgcwele sahluko se 13, incenye nje. Nine lenigcina

emaBhayibheli enu edvute, futsi nitsandza kufundza nilandzele, lapho sisafundza.

<sup>21</sup> Futsi masinyane emvakwalenkonzo, kusihlwa, kutoba nemalungiselelo emshado lapha. Ngako, kutawutsi nje singakhululwa, uma sitophutfuma ngekushesha impela, njengoba singakhona. Kungesiko kujaka; kutawutsi nje masinyane sakhiwo sesingenalutfo, khona-ke bafuna kwenta emalungiselelo emshado. Futsi kutoba nemshado lapha, kusasa ebusuku. Bantfwana betfu lababili kulenhlanganyelo yalelitabernakeli kutoba nemshado kusasa ebusuku, njengoba nonkhe nati. Umnaketfu lotsandzekako, David Wood uyashada, ushada naMarilyn Jefferies, kusasa ebusuku, etabernakeli, ngaphambi nje kwetinkonzo. Futsi ngako lomshado ufanele wentwe emalungiselelo. Nje... Ngeke kube ngulobophekile; kutoba ngumshado lobopheke incenye kusasa ebusuku.

Manje, ngaphambi kwekutsi sifundze Livi laKhe, asesikhuleke.

<sup>22</sup> Babe, Nkulunkulu, njengoba sita ngenhloniphoyekutitfoba kakhulu eBukhoneni baKho, kubeka phambi kwetfu leloGama laJesu lelenele konkhe, siyacini sekiswa kutsi Utosiva. Ngoba, Watsi, "Celani Babe nomayini eGameni laMi, Ngitolwenta." Ngako-ke, sita, njengemakholwa langemaKhristu, ngesibindzi eSihlalweni sebukhosimusa, sati loku, kutsi, uma tinhltiyo tetfu tingasilahli, khona-ke siyati kutsi sinesicelo setfu siphendvulwe nguNkulunkulu.

<sup>23</sup> Futsi sikhulekela kutsi timphilo tetfu tenelise kakhulu kuWe, ngekuvuma kwetfu emaphutsa etfu, nekulunga kwaKhe kusicolela, kutsi tifiso tetfu titogcwaliseka kusihlwa. Futsi, Nkhosi, sifiso setfu lesikhulu kunato tonkhe kubona umusa waKho lomkhulu ucitsekela etikwetfu, futsi ku—kuku, tsetselela tono tettu futsi nekuphilisa labagulako emkhatsini wetfu. Futsi Ungahle ukhulume kitsi ngendlela yesambulo, noma siprofetho, noma nje nomayini loko Lobewungafisa kukusho eBandleni laKho. Kwangatsi tinhltiyo tetfu tingaba titja kuMoya waKho. Kwangatsi singachunyaniswa kakhulu nemtsambo lomkhulu kusihlwa, kutsi Moya loyiNgewe angakhulumatinhltiyweni tetfu, futsi avete inkhatimulo eBukhoneni baKhe.

<sup>24</sup> Manje, Nkhosi, sikhulekela bonkhe labagulako nalabeswele. Ngoba, ngaphambi nje kwekufika, njengoba mabhalane wetfu akuletse edeskini lami, etinsukwini letimbili letendlulile, luchungechunge nje lwemagama, esiveni jikelele, lesihlaselekile, sifa, timo letiphutfumako tibhalwe ngalokubovu. Futsi njengoba ngibeka umuno wami ngetulu kwangalinye lawo, ehla ngelikhasi, O Nkulunkulu, ebukhoneni balelibandla, kusihlwa, ngincusa umusa waKho nesihawu, ngamunye. Wena wati ngamunye wabo, naloko labakudzingako.

<sup>25</sup> Futsi besingeke sikhohlwe ngulabo, Nkhosi, labelulamako, kusihlwa, longaleya ekhatsi emakhaya alasebakhlile nalababutsakatsaka. O Nkhosi Nkulunkulu, labanengi balabo babantfiana labagezwe ngeNgati yaKho. O, lapho sesiguga, nalabatsandziwe betfu bakhohliwe, kunendvudvuto yinye lesinayo: Nkulunkulu akakhohlwa. Tonkhe tento tetfu tibhaliwe encwadzini yekuPhila, futsi tihlala njalonjalo eBukhoneni baKhe. Futsi sitobancusela, kusihlwa, Nkhosi.

<sup>26</sup> Sicelela sive setfu sihawu. Nesabo labo labonako futsi benta lokungakalungi, nesabo labo labasemabhareni na—nasetikhundleni letehlukene tesono, kusihlwa, sitsandza kucela umusa locolelako, Nkhosi. Futsi sikhulekela kutsi Utosicinisa kakhulu, Nkhosi, kutsi tinhlitiyo tetfu titogewala kakhulu lutsandvo lwaKho, kutoba sifiso setfu lesikhulu kakhulu kutsi sikhonte Wena nekubona labo labasindzisiwe.

<sup>27</sup> Busisa kufundvwa kweLivi, nako konkhe lesikwentako. Ngekutfobeka sitokhotsamisa tinhloko tetfu futsi sibonge Wena, ngoba sikucela eGameni laJesu. Amen.

<sup>28</sup> Manje vulani encwadzini yaJohane loNgcwele, sahluko 13, sitofundza incenye.

*Manje ngaphambi kwemkhosi weliphasika,  
ngesikhatsi Jesu ati kutsi sikhatsi sakhe sasesifikile  
kutsi ahambé kulomhlabá aye kuYise, sekabatsandzile  
bakhe labasemhlabeni, wabatsandza kwaze kwaba  
sekugcineni.*

*Nase kudliwe kudla kwakusihlwa, develi manje  
sekakufake enhlitiywéni yaJudasí Iskariyóthe,  
indvodzana yaSimoni, kutsi amkhaphéle;*

*Jesu akwati kutsi uYise unikele konkhe etandleni  
takhe, nekutsi wavela kuNkulunkulu, futsi wabuyela  
kuNkulunkulu;*

*Usukuma esuka ekudleni kwakusihlwa, wase ubeka  
tembatfo takhe eceleni; wase utsatsa lithawula, wase  
uligaca kuye.*

*Emvakwaloko watsela emanti emgezelwéni, futsi  
wacala kugeza tinyawo tebafundzi, nekutesula  
ngelithawula lebekaligacile.*

*Wase-ke uta kuSimoni Phetro: naPhetro watsi kuye,  
Nkhosi, wena ugeza tinyawo tamí?*

*Jesu waphendwula watsi kuye, Loku lengikwentako  
manje wena awukwati... kodvwa utawukwati  
emvakwaloku.*

<sup>29</sup> Kwangatsi iNkhosi ingeneta tibusiso taYo ekufundzeni kwaYo, kweLivi. Ngifuna kutsatsa kwe—kwesihloko, kusihlwa, kwesikhatsi lesifishane nje, sihloko lesitsi: *Imifanekiso*

*YaKhristu.* Futsi ngifuna, kwesifundvo, “Bekungaba yini loku na? Kubita ini kwenta umKhristu?”

<sup>30</sup> Manje, ngiyati loku kutsi, kanye kanye, hhayi sihloko sekuvangela, nhlobo. Kepha, noko, sihloko sekuvangela, ngoba liBandla lingekе lachubekela embili lize Lati indzawo yalo leLichubekela kuyo.

<sup>31</sup> Futsi ngiyakholwa kutsi ngaphambi kwekutsi noma ngubani aze akhone kunyakata noma abe nekukholwa sibili lokuyimfihlo, kukutsi, kucala, bafanele bati kutsi beme kuphi,nekutsi kumiwa kanjani emvakwekuba sebente kuma kwabo. Ngikholwa kutsi loko kubalulekile. Ngoba, awukwati nje kudlubulundzela utsi ngcu entfweni letsite, ngekukholwa, uma ungati kutsi uyotsi ngcu kuphi. Ufanele wati. Futsi uma kukholwa kwetfu sekubekwe kahle, futsi endzaweni lefanele, kuniketa kweneliseka kwanjalonjalo.

<sup>32</sup> Kunjengoba kushiwo ngewesifazane kutsi, mhlawumbe, uma sekashadile, kutsi ukakhulu—unekulangatelela kakhulu kusingatsa luswane lwakhe loluncane lwekulala, kutsi akati nhlobo... angalindza. Kodvwa yena, kulindzela kwakhe kunjalo. Kodvwa, ngemuva kwaloko, kukhona kwesaba, uma kungakhombisi masinyane, kutsi akanawuba nalo loluswane. Ngako loko kumkhweshisela khashane, sonkhe sikhatsi.

<sup>33</sup> Manje, kukhona likhambi labalentako kuletinsuku leti, futsi liye lasebenta kuyo yonkhe iminyaka, uma lowo wesifazane abona noma akholelwa kutsi ngeke alubeleke loluswane. Uma nje atophuma nje futsi atitfolele luswane, khona-ke, intfo yekucala uyati, utoba nelwakhe. Manje, loko kufakazelwe kutsi kucinisile, emahlandla layimfica kualishumi. Ngoba lowomtfwalo wekutibuta, “O, mhlawumbe ngeke ngibenalo.” Kodvwa loko kubita loko kweneliseka lokuncane lapho, futsi mhlawumbe indlela yaNkulunkulu yekumfaka esimeni. Khonake utoba neluswane lolungelwakhe, ngoba loko kwetfuka nekulindzela ekugcineni kutomshia.

<sup>34</sup> Loko yindlela lefanako lokungayo ngebantfu labafuna kutfola kophiliswa, bona, uma bangakhona nje kuba nebufakazi lobuncane lobubonakalako.

<sup>35</sup> Njenga-Eliya, ngesikhatsi atsite... Gehazi watsi, “Ngibona lifu lelingangesandla semuntfu.”

<sup>36</sup> Eliya utsi, “Ngiva umsindvo wemvula lenengi.” Wabona bufakazi lobubonakalako.

<sup>37</sup> Kungako, tikhatsi letinengi, ngitjela bantfu, “Chubekani, calani nidvumise iNkhosi.” Niyabona na? Ngoba, lowo ngumntfwana lofakwe esiswini, ngoba kusekuhlakanipheni kwabo kute kungene emphefumulweni wabo, kutsi baphilisiwe, khona-ke kukholwa kukwenta kulunge.

<sup>38</sup> Ufanele wati kutsi wentani. Ufanele ube nekutetsema kuloko lokwentako.

<sup>39</sup> Ngako-ke, tikhatsi letinengi kangaka, siva lokuvakalisa loku, “O, uyini umKhristu?”

<sup>40</sup> Labanye bantfu bakugcinisa ekujoyineni libandla nje. Lomunye watsi, “Yebo-ke, umKhristu uli—lilunga lelibandla, lomunye lotsatsa budlelwane babo nelibandla.” Ngikholelwa kutsi onkhe emaKhristu afanele ente loko, kodvwa angikholwa kutsi lobo buKhristu. Niyabona na? Nguloko umKhristu lakwentako ngemuva kwekuba sekabe ngumKhristu. Kodvwa akusho, kutsi, ngoba uyakwenta, kutsi ungumKhristu.

<sup>41</sup> Khona-ke labanye batsi, “Cha. Kukuya esontfweni futsi wente simemetelo setivumokholo, futsi wetsembeke kuleto tintfo letifundziswa libandla.”

<sup>42</sup> Futsi-ke kukhona labanye labasho, kutsi, “Mhlawumbe kuphatsa intfo lencane—lencane kubo, siphambano le—lesincane noma intfo letsite, kutsi loko sibonakaliso semKhristu.”

<sup>43</sup> Yebo-ke, bese-ke kubakhona labanye labakholwa, kutsi, “Enceny, mhawumbe, uma batoshisa likhandlela, noma bente luhlobo lolutsite lwekutisola, kutsi lowo ngumKhristu. Uma batocwiliswa emantini nje kuphela, noma batokwenta umhlatjelo lotsite, noma banikete lokuhle ebandleni, noma—noma basite makhelwane, batsengele umfelokati emalahle, noma ticatfulo tentsandzane.” Leto tento umKhristu lafanele atente, kodvwa loko akubenti babe ngumKhristu.

<sup>44</sup> Bese-ke labanye basho, kutsi, “Uma utophatse umfanekiso waKhristu emotweni yakho, noma elubondzeni lwakho, kutsi loko kuluphawu lwekutsi ungumKhristu.” Yebo-ke, leto tintfo tonkhe tilungile, kodvwa angikholelwa kutsi kutfwala umfanekiso kukwenta ube ngumKhristu.

<sup>45</sup> Ngikholwa kutsi kuba ngumfanekiso waKhristu kukwenta umKhristu. Akusiko loko lesikwentako, ngephandle. Nguloko lokwentekekile, ngekhatsi, lokusenta sibe nguloko lesingiko. Futsi-ke, ngako-ke, uma Yena angumfanekiso wetfu, natsi sifana naYe futsi singemalunga eMtimba waKhe, sifanele sibe yimifanekiso lefana naYe. Khona-ke timphilo tetfu tifanele tibonakalise umfanekiso waKhristu, hhayi ekujoyineni kwetfu libandla, noma ekutfwaleni kwetfu umfanekiso wesiphambano saKhristu, noma emadlingozi etfu, kodvwa kufanele kube seBukhoneni lobuphilako baNkulunkulu lophilako lobubonakaliswe ekuphileni kwetfu.

<sup>46</sup> Ngitjeliwe, ngulabasemagunyeni, kutsi...ngaphambi kwekutsi babe netinsuku tesincibilikisi, kukhipha i—inkhucuta egolideni, batsatse insimbi ne-pyrite. I-pyrite isondzele kakhulu, njenjegolide mbamba, ize ibitwe ngekutsi “yigolide yesiwula.” Kodvwa indlela lebebakhipha ngayo konkhe loko, kutsi bakushaya bakukhiphe ngesandvo. EmaNdiya bekavame

kwenta loko. Futsi labasebentana netintfo letentiwe ngegolide labadzala bebabamise kukwenta, bayishaye ngesandvo, bese bayayigucugucula, futsi bayishaye ize yonkhe inkhucunkhucu iphume kuyo. Futsi indlela kuphela lebebati ngayo kutsi kwase kuphansi egolideni, kwakungesikhatsi lapho umshayi bekasakhona kubona sitfombe sakhe kuyo. Lowo lobekashaya bekahlala njalonjalo abuka, kute akhone kucishe ashefe, ngesitfombe sakhe lucobo egolideni lebekayishaya.

<sup>47</sup> Futsi uma Moya loyiNgcwele waNkulunkulu acala kusishaya, ngesandvo seliVangeli, kuze kutsi tonkhe tintfo telive tishaywe taphuma, futsi sesingabonakalisa umfanekiso weNkhosi Nkulunkulu, khona-ke ngiyakholwa kutsi sibese siba ngemaKhristu. Ngoba, leligama lelitsi *umKhristu* lisho “kufana naKhristu, nekuMbonakalisa.”

<sup>48</sup> Manje loko akusho kutsi sifanele sikhulise silevu lesidze, njengoba tingcweti tiMdvweba anaso. Futsi akusho nekutsi sikhulisa tinwele letindze, njengoba tingcweti tiMdvweba sitfombe anato, noma kugcoka ingubo lendze njengoba Bekayigcoka, ngoba siphila kulolunye lusuku. Asidzingeki kutsi sibenguloko, kubonakalisa umfanekiso waKhe wemtimba.

<sup>49</sup> Kodvwa sifanele, emiphefumulweni yetfu, sibonakalise umfanekiso waKhe waMoya nendlela yaKhe yekuphila. Angikholelwa kutsi emaKhristu akhiwe ngekujoyina emabandla netivumokholo. Ngikholwa kutsi kukubonakaliswa kwajesus Khristu esidalweni lesingumunfu, ngoba singemalunga aKhe, emalunga eMtimba waKhe, futsi siphetse umfanekiso waKhe, umBhalo uyasho.

<sup>50</sup> Manje, hlobo luni lwemfanekiso Bekangiwo yena? Aketelanga kutsi abe ngumunntfu lomkhulu lotsite; noko, Bekanguye. Kodvwa Weta njengenceku. Aketelanga kutsi atokhontwa, kepha kutsi yena atokhonta. Sihloko setfu, kusihlw, sibonakalisa loko Bekangiko. Nguloko lokumenta abe mkhulu, ekulinganiseni kwami. Kepha noko, abe anguye kanye nje loNkulunkulu weliPhakadze, yena kanye nje loNkulunkulu Lowadala emazulu nemhlaba; futsi ngesikhatsi Efike lapha, Watsatsa sikhundla lesiphansi kunato tonkhe, umsebenti longalangateleki kakhulu kutsi noma ngubani angaba nawo, lowo kwakukutsi abe sisebenti sekugezabantu tinyawo.

<sup>51</sup> Kuyo yonkhe imiholo, kwasetinsukwini takucala, emhlabeni wangaseMphumalanga, sisebenti sekugezabantu tinyawo kwakungumunntfu loholelwa kancane kunabo bonkhe. Ngoba, ngaleto tinsuku tilwane tatihamba emigwacweni lemikhulu, kutsi, tindlela letincane letijubelako lebebahamba ngato. Futsi emgwacweni, kwakunuka, wonkhe umgwaco, lapho tilwane tatikhona. Nelutfuli lwalundiza luphakame futsi lufika emilenteni yabo nasetinyaweni tabo. Futsi loko kunuka kabi lokunjalo, njengoba kwakunjalo! Futsi nekushesha

nje lapho lotsite eta kutovakashela lomunye, bekangeke angene angaleyondlela. Bekanuka kabi, lokuvela ekunukeni kwemgwaco, nelutfuli, njengasekutungeleteni si—sitebele sekugcina emahhashi.

<sup>52</sup> Ngako, intfo yekucala bekayenta, bekaneligunjana lelincane, ligunjana lekwemukela bantfu, nemuntfu loholelwah liholo lelincane kunabo bonkhe endzaweni, njengesigcila lesitsite, bekahlala emuva ekhatsi lapho, kutsi ageze tnyawo talesimenywa lebesita, futsi asinikete lelinye lipheya leticatfulo kutsi sitigcoke, emasandali lamancane, kuwafaka kuye. Futsike bekagcotjwa, futsi, ke, ngemafutsa. Futsi bekabese ke uyangena kutsi abe simenywa semngani wakhe. Ngoba, bekatotiva angasikahle, angena, agcwele kunuka lokukhulu kwe—kwemigwaco, nekujuluka, nalokunye nalokunye. Futsi lesisebenti sekugeza bantfu tnyawo sasihola kancane kunawo wonkhe umuntfu lobekakhona.

<sup>53</sup> Futsi Nkulunkulu waseZulwini, watitfoba, kuba... Lomkhulu kunabo bonkhe lobekakhona waba ngulophansi kunabo bonkhe lobekakhona.

<sup>54</sup> Umehluko lonje pho, lobitwa ngekutsi, kubonakalisa umKhristu namuhla! Umehluko lonje pho! Ngani, labo lababitwa ngemKhristu namuhla ufuna kukhontwa. O, ucala kucabanga kutsi ungumuntfu lotsite.

<sup>55</sup> Umehluko lonje pho kuloko, lokwakungiko, ngesikhatsi Abonakalisa Yena. Akateli kukhontwa. Kodvwa Uba... Utela kutokhonta. “Lomkhulu emkhatsini wenu akabe yinceku yabo bonkhe.”

<sup>56</sup> Futsi sibonile, namuhla, kutsi umkhuba wetfu wanamuha webuKhristu kutsi, “Ngingumuntfu lotsite, futsi wena awusilutfo.” O, kuyi... Akukalungi. Akukafaneli kube ngaleyondlela. Sitama kubonakalisa buKhristu ngendlela lengakafaneli. Nkulunkulu akafuni kutsi sikkwente ngaleyondlela. Yena... Sahlabela liculo lelitsi, *Kufana NaJesu*, kodvwa uma sekuta ekutehliseni kwekutatisa kwetfu, nekwehla njengoba Enta, khona-ke sidvweba lilayini.

<sup>57</sup> Futsi ekwenteni njalo, umuntfu ubumbe emahlelo, kutsi bangatihlukanisa bona lucobo, “ubonakala angenawo uMoya,” njengoba kwasho umBhalo. Bayatehlukanisa bona lucobo. “Sibelibandla lelitsite-tsite. Loku li—libandla lelikhudlwana. Libandla lelincono. Lihlelo letfu lihlelo lelikhudlwana.” Loko akwenti njengaJesu. Loko akubonakalisi lutsandvo lwaKhe nebuntfu baKhe.

<sup>58</sup> Wefika kulabaphansi kunabo bonkhe, engwadleni yasesitaladini, kumuntfu lophila ngekucela, futsi wahlala phansi ngco elutfulini kanye nabo. Nguleyo imphilo yemKhristu. Nguleyondlela lokufanele kube ngayo, kubonakalisa Yena ngaleyondlela.

<sup>59</sup> O, ngiyati bantfu batsi, “Lolo li—lolo tinsuku lesetendlula.” Akunjalo.

<sup>60</sup> Uma Khristu asolo anguKhristu, uma uMoya waKhe usenguMoya loyiNgcwele lowawukuYe, ukuwe, Üyokwenta utsatse leso sikhundla, nawe.

<sup>61</sup> Kodvwa, namuhla, sitama kucabanga kutsi sehlukile. Kukhweshe kangakanani emkhulekweni waKhe, lapho Akhulekile, kutsi, “Loku bonkhe bantfu abati kutsi sibafundzi baKhe, uma sinelutsandvo ngalomunye nalomunye.”

<sup>62</sup> Futsi esikhundleni saloko, siyaphikisana lomunye nalomunye. Siyedzelelana lomunye nalomunye, ngoba asivumelani etikwetintfo letitsite. Futsi siyaphuma futsi—futsi isolane lomunye nalomunye, niyabona, lapho...futsi noko sitisho kutsi singemaKhristu. Ngiyabati bantfu labatisho kutsi bagewaliswe ngaMoya loyiNgcwele, unelicala ngetintfo letinjalo, bayaphuma futsi—futsi impela basho tintfo letimbi ngalamanye emaKhristu. Kantsi, bebangakafaneli bente leto tintfo. Manje, mnaketfu, dzadze, uma sinalolohlobo lwemoya, sesingavele singene engcondvwensi yetfu kutsi sisengakabi maKhristu namanje. Akunandzaba kutsi sivuma kangakanani, nguloko lesinako lokusho lutfo. Niyabona na? Singeke sibe ngemaKhristu futsi singabatsandzi bonkhe bantfu. Singaba ngulabehlukako kubantfu.

<sup>63</sup> Kodvwa, Jesu akazange afake futsi atsi, “Yebo-ke, manje, lapha, nonkhe nine baFarisi, nonkhe niya esihogweni. Futsi akukho tfuba kuwe, nganca *yaloku*, *lokwa*, noma *lolokunye*, ngoba ungumFarisi.” Kodvwa Waya kubo, futsi Wabakhontisa, futsi Wabasita. Wente konkhe Bekangakwenta, kubasita.

<sup>64</sup> Kodvwa, namuhla, timfundvo, nebulunga belibandla, netibopho telive kuhlanganise libandla ndzawonye kangangekutsi lohlakaniphile sewutsetse indzawo yakamoya.

<sup>65</sup> Ungeke ufinyelele kuNkulunkulu ngephandle kwaMoya. Kunendlela yinye kuphela umuntfu laneta ngayo kuNkulunkulu, futsi leyo ingaMoya loyiNgcwele. Jesu watsi, “Akekho longeta kiMi, uma Babe angamdvonsi, kucala.” Loko nje kuliciniso ngako konkhe, umKhristu.

<sup>66</sup> Sifuna kutsatsa libhukwana lelincane, kusihlwa, enhlitiywensi yetfu, futsi sibhale tintfo leti manje. Ake sicabangе loku.

<sup>67</sup> O, labanye betfu batisho kutsi banalo lonkhe lwati. Sinalabo labatsi, “Manje asewume!” Batsandza kuba “bodokotela” nabo “fada labangcwele,” nalokunye nalokunye. Kodvwa wati konkhe loku, uma bewunalo lonkhe lwati, belungeke lukusite ngalutfo ngaphandle uma wena (bewu) bewunaMoya kuwe, welutsandvo. LiBhayibheli latsi, “Noma beginelwati lonkhe, kepha ngingenalo lutsandvo, angisilutfo.”

<sup>68</sup> Futsi lusita ngani lwati lwetfu, lapho lomunye atsi, “Ngingeke ngiye emvuselelweni lenjalo, ngoba labo abasibo bantfu labafundzile. Ngi—ngingeke ngitihlanganise nabo”?

<sup>69</sup> Akunandzaba nomangabe ababati bo-ABC babo, noma cha, bangamati Khristu. Ngalokucinisekile angeke kwehle kakhulu. Kwangatsi Nkulunkulu angagcina njalo lowo Moya kimi. Kungenandzaba kutsi kuphansi kanjani—kanjani, loko lakukholwako, loko langakukholwa, ngusiphi sivumokholo, libala, noma ini, ngifuna kufinyelela lapho futsi ngimsite. Impela. Ngifuna lowoMoya kimi. Ngeke ngicabange kutsi ngincono kunalomunye umuntfu; bengingacunsula sifuba sami, futsi ngitsi, “Bonkhe bantfu abasukume nangingena,” noma, “Nginemkhankaso lomkhulu kunayo yonkhe yayo.” Ngingubani, empeleni, kepha lubumba nje Nkulunkulu lalwentile? Angitifobe, kute imphilo yaKhe ibonakaliswe. Ake, onkhe emaKhristu, ativele kanjalo. Lwati alusifikisi ndzawo.

<sup>70</sup> Sibonelo, kube ke bekukhona hhodle logeweley tinyoni ema-khanari, futsi hhodle lomkhulu nganganalitabernakele ke? Futsi inyoni lencane i-khanari indizela etulu kuuhodle itsi, “Banumzane labahloniphekile, ngifuna kunitjela nonkhe intfo letsite. Sengingumachuzu lomncane kini nonkhe. Niyabona, ngi—ngiyinyoni i-khanari leyati konkhe ngetidalwa letibantfu. O, ngingakuchaza konkhe. Ngimbonile dzadze ahamba endlini. Ngibone bantfwana badlala. Ngati konkhe ngako. Manje nonkhe ngilaleleni.”

<sup>71</sup> Futsi cishe ngesikhatsi yena ikhefuta lokuvela ebucosheni bayo lobuncane, indvodza yasekolishi iPrinceton University iyasukuma, nekukhuluma nekubhalwa kwelulwini lokupolishwe kahle kakhulu. Futsi icala ingcogciswano lencane naleyonyoni i-khanari, isebeitisa kukhuluma nekubhalwa kwelulwimi lokusetulu kunako konkhe langakwati, futsi ikhuluma kulenyoni lencane i-khanari. Ngingacabanga kutsi umfo lomncane atolekutisa inhloko yakhe. Uyolalela kusukela eluhlangotsini lunye kuya kulolunye, kodvwa akati lutfo lakhuluma ngalo. Noko, iyakhona kumuva. Noko, iyakhona kumbona. Kodvwa lwati lwakhe lusita ngani? Lutfo. Ngoba, ayati kutsi lomuntfu ukhuluma ngani. Ngani na? Inebucopho benyoni ye-khanari. Ayinabo bucopho bemuntfu. Icondza nje njengoba tinyoni ema-khanari ticondza.

<sup>72</sup> Futsi nguleyondlela umuntfu langayo. Anginandzaba kutsi ungumuntfu lohlakaniphe kangakanani. [Umnaketfu Branham ugogota epulpiti emahlandla lasihlanu—Umhl.] Sisenebucopho benyoni i-khanari, ngoba sitidalwa letibantfu kuphela. Nkulunkulu watiwa ngaMoya, nangesambulo ngaMoya loNgcwele. Angeke sikhone kuMcondza ngekuhlakanipha. Ungahle ukhulume, futsi ungene futsi ube nemihlangano yalabahlakaniphile, kanye nesayensi yekusebenta kwengcondvo

kangangoba ufunu, futsi bantfu abasoze bamati Nkulunkulu. Ngeke bakhone.

<sup>73</sup> Ungachaza futsi utsi bantfu labakhalako futsi bagucule lesinye sihlatsi bayifashini lendzala nje, kodvwa ngulowo umuntfu lobonakalisa Khristu emphilweni yakhe. Umuntfu lotitfobile, umuntfu lotohamba naNkulunkulu, utotiphatsisa kwaje.

<sup>74</sup> Kodvwa, niyabona, inyonu lencane beyingeke yacondza, noko bekacabanga kutsi yayingakhona. Ngoba, akentiwanga ngaleyondlela. Kuhlakanipha kwakhe ngeke bucatsaniswe nekuhlakanipha bemfundzi lokhaliphile.

<sup>75</sup> Futsi kanjalo kuhlakanipha kwetfu ngeke kucatsaniswe naNkulunkulu. Kungenteka kanjani kutsi ingcondvo yetfu lencane, ingcondvo lengenamkhawulo ike icatsaniswe nengcondvo lenemkhawulo; noma ingcondvo yetfu lenemkhawulo ike icatsaniswe nengcondvo lengenamkhawulo yaNkulunkulu na? Leyongcondvo lengenamkhawulo yaNkulunkulu ingetulu kakhulu kunekuhlakanipha kwemuntfu ize ingasabikhona.

<sup>76</sup> Indlela kuphela lenyoni leyoke yati kutsi umuntfu ukhuluma ngani, ngekutinikela yona lucobo futsi ikwemukele, futsi yente nomayini lecabanga kutsi indvodza ifuna kutsi ikwente.

<sup>77</sup> Ngiyo kuphela indlela lesati ngayo Nkulunkulu, ikulandzela kuhola kwaMoya loyiNgcwele. Leyo yifashini lendzala. Luhlelo lwaNkulunkulu. Bekuhlale njalo kuluhlelo lwaNkulunkulu. Kuyohlala njalo kuluhlelo lwaNkulunkulu. "Hhayi ngemandla, hhayi ngetikhwepha, kepha ngaMoya waMi, kusho iNkhosi." Ngulapho la kuvela khona.

<sup>78</sup> Longfellow wake washo loku, "Indlela yekuphumelela ikutfola sizatfu lesifanelekile lokukhulunywe ngaso, sizatfu lesifanelekile lokukhulunywe ngaso, bese-ke ubambelela kuso." Impela. Lokutsite lokukhulunywe ngako, kwaliwa yi—yisayensi, futsi, uma kufanelekile, khona-ke bambelela kuko.

<sup>79</sup> Niyati, nga 1872, iNhlangano Yetekwelapha yase-United States yawala emabhavu ekugezelana? Batsi, "Ngalokuphelele akahlanteki." Futsi batsi, "Atokwandzisa tifo." Emabhavu ekugezelana; ekugcineni beta kuwo.

<sup>80</sup> Futsi leliVangeli leliyifashini lendzala lesikhuluma ngalo, lelihlantwe eNgatini yeliWundlu! Lingabonakala liyifashini lendzala, kodvwa batodzingeka bete kuLo, masinyane noma kamuva. Sizatfu lesifanelekile. Bambelela kuLo, ngako konkhe lonako. Liyindlela legezwe ngeNgati lehlanta umuntfu; hhayi kuphumela lapha, kunatsa nekubhema, nekubutsana ndzawonye nekutibita nge "mKhristu" ngoba bangulabasebandleni. Lingulowo lohlantekile, Moya loyiNgcwele longakabhicwa nalutfo emphilweni yemuntfu, lobonakalisa Jesu Khristu iNdvodzana yaNkulunkulu.

<sup>81</sup> Kungako bantfu namuhla bala kuTalwa lokusha. O, banaloko labakubita ngekuTalwa lokusha, indlela yekuchawulana nemelusi, kodvwa loko akusiko kuTalwa. Sizatfu bona...Ngeke baLemukele. Kungako bahamba bayojoyina emabandla, ngenca yekutsi bangangena ngalenyenidlela yekuhlakanipha.

<sup>82</sup> Nkulunkulu watsi, “Uma umuntfu angakatalwa kabusha, ngeke awubone ngisho nekuwubona uMbuso waNkulunkulu.” Kungenandzaba kutsi unekuhlakanipha lokunganani, noma ungumKhristu lotisho kahle kanjani, ufanele utalwe kabusha.

<sup>83</sup> Wena utsi, “Ngako-ke, Mnaketfu Branham, kutodzingeka ngite kulenye imishini lencane na?” Loko akusho loko. Kusho kutsi utofanele wemukele kuTalwa lokusha. Ufanele utalwe kabusha.

<sup>84</sup> Leti tetsameli letibhicene, kodvwa ngitosho lokutsite. Yini kutalwa na? Uma kutalwa kwenteka etjanini lobomile, noma uma kwenteka esiyilweni sendlu, noma esibheddlela lokukutsi emagumbi lahlotjiswe ngesilikha lephinki, kuyinyakanyaka, noma nguyiphi indlela lokutsatsa ngayo. Kunjalo.

<sup>85</sup> Futsi kunjalo nekuTalwa lokusha. Kuyinyakanyaka, noma nguyiphi indlela loKutsatsa ngayo, kodvwa kuveta kuPhila. Amen. Kuveta kuPhila. Hloblo luni lwekuPhila na? KuPhila kwenceku, kutifoba, kutidzela. Ngulolohlolo lwekuPhila. O, batsi, “Kodvwa ngibabonile bakhala futsi babubula ngase-altari futsi bachubeka.” Impela. Bayatalwa. Kuyinyakanyaka, anginandzaba kutsi uya kuphi. Ungahle uvuke, buso bakho bonkhe bugeweleye tinyembeti, nemehlo akho abovu, netandla takho tiluhlata ngekushaya e-altari, kodvwa kukuTalwa. Kwenta lokutsite kuwe. Kukwenta inceku. Kukhipha kubopheka kuwe. Kwenta umfanekiso, kubumba kuPhila lokusha, indalo lensha. Ungahle kube uyinyakanyaka yonkhindzawo, lapho uvuka, kodvwa utelwe kabusha. Kungenandzaba kutsi ukuphi, kwenta kuPhila lokusha. Kuletsa lokusha, umfanekiso wekuPhila. Kuveta inceku kuwe. Ufuna kukhonta, khonake. Jesu ufunasikhontane lomunye nalomunye, sitsandzane—sitsandzane lomunye nalomunye. Futsi lapho sisakhontana, sikhonta Yena.

<sup>86</sup> Manje, khumbulani, ngulabagulako kuphela labafuna kunakwa, inkonzo. Labagulako nje, bafuna kunakwa. Futsi uma ubona umshumayeli...Futsi angingagcini kuphela kumshumayeli, kodvwa angigcine kulo lonkhe lilunga lelibandla lelifuna kunakwa, “Ngingumuntfu lotsite,” khumbulani nje, kukhona umuntfu logula ngakamoya. Bafuna kunakwa. Badzinga kunakwa nguMoya waNkulunkulu, kutsi ubanike lokutsite lokutokhipha leso simo sekutiphatsa kubo, futsi sibaphilise emoneni kanye nemibono lemikhulu, na “ngimkhulu

mine futsi umncane wena.” Moya loNgcwele usenta sonkhe sifane.

<sup>87</sup> Kugula lokukwakamoya lokunengi kakhulu, kuba nesifo sekushodelwa yingati! Niyati kutsi yini sifo sekushodelwa yingati na? Ngumuntfu longenayo ingati. Bahamba ngalokungakejwayeleki. Badidekile, bahlaneketelwe tingcondvo, ngaso sonkhe sikhatsi. Futsi nguleyo indzaba ngelinengi lemalunga etfu elibandla namuhla. Banesifo sekushodelwa yingati. Badzinga kufakwa iNgati, kwaseKhalvari, lokutobanika letiyile, iNgati yasebukhosini, kutsi ibente bahambe ngefashini lendzala, indlela yaMoya loNgcwele yaNkulunkulu lehleshuliwe. Letobanika lokutsite kutsi bakuphilele, ibanikete sibindzi lesitobenta bahambe emfanekisweni weNkhosi yabo.

<sup>88</sup> Ngekwami, kube benginelitfuba lekukhetsa, ngikufuna kuba njengoba Bekanjalo. Wafikela kuba ngumelusi wetimvu, futsi Bekangumelusi wetimvu. Umelusi wetimvu nguye lolandzela timvu takhe.

<sup>89</sup> Umfanekiso lodvumile, angicabangi kutsi sinawo elubondzeni lwetfu lapha, kodvwa ngiwubeke egumbini lami futsi ngawubuka. Angisalikhumbuli ligama lalomdvwebi manje. Kodvwa ngesikhatsi alahlekelta nguleyo lencane, imvu lemnyama, futsi ushiya emashumi layimfica nemfica uya kuyoyifuna, wenta ini? Unhlanhlatseka ehlane. Utisika ngetihlahla letinemanyeva. Uhamba udzabula etingotini. Unyonyoba bonkhe busuku. Kute kutsi, ekugcineni, entasi le emmangweni wentsaba, lelenga ehlashaneni, abeka imphilo yakhe engcupheni, uyafinyeleta futsi ukhipha umfo lomncane esimeni sakhe lesiwile, bese-ke umbuyisela kuye.

<sup>90</sup> Futsi lomunye umdvwebi wadvweba umfanekiso wakhe amletsa ekhaya. Manje, kubonakala kwangatsi lomelusi bekayofaka nje umkhono wakhe ngaphansi kwemvu, bese ucala kuyiletsa *kanjalo*. Kodvwa niike na caphela kutsi umoya walibamba kanjani libhulashi lalomdvwebi? Akayifakanga ngaphansi kwemkhono wakhe. Uyibeka etikwemahlombe akhe. Manje ngifuna nibone kunakekela kwalomelusi.

<sup>91</sup> Manje, Jesu, ngesikhatsi Akhipha emadimoni, Watsi Ukwente ngemuno waNkulunkulu. Manje, uma develi akukhatsata, intfo kuphela lokuyibitako, kwaNkulunkulu, u—nje u—akabaluleki nje kangangoba Utsatsa nje umuno waKhe bese uyakukhipha.

Kodvwa uma imvu seyibuyela ekhaya . . .

<sup>92</sup> Ikuphi incenyen lenemandla kakhulu yemuntfu? Etikwemahlombe akhe. Niyacaphela kutsi kanjani indvodza, sonkhe sikhatsi, emahlombe ayo lingulelikhulu kunako konkhe? Angawutfwala kuphi umtfwalo wakhe lomkhulu kunayo yonkhe

na? Etikwemahlombe akhe. Ngukuphi lapho aciniseke kunako konkhe na? Lapho umtfwalo uvundle etukwemahlombe akhe.

<sup>93</sup> Ngako utsatsa imvu, uyigaca emahlombe akhe, futsi abuyelete emuva ngesineke nayo. Onkhe emandla aNkulunkulu, agocwe kulowo lomncane, umfo lolahlekile, ambuyisela emuva. Kodvwa develi, kalula kakhulu, Uvele nje ayilahlele ngephandle, ngemuno waKhe. UnguMelusi.

<sup>94</sup> Umelusi ufanele anhlanhlatskeke, kute atfole ledukile. Futsi umelusi lolungile ungumelusi wetimvu. Ngalokusobala, le—leligama lelitsi *umelusi* lisho “umelusi wetimvu.” Futsi ngaletinye tikhatsi, ebandleni, i—inkholoze lencane noma licenjana lelincane litovuka ebandleni; luhlangotsi lolulodvwa lutotfola lenye indlela, futsi luhlangotsi lolulodvwa lenye indlela. Yena mbamba, umelusi lolungile utohamba nalelo cenjana, (Kutsi enteni na?) kubabuysa. Yena mbamba, umelusi weliciniso, wentani na? Uyonhlanhlatsaka, yena lucobo, (Kutsi enteni na?) kubuyisela lolahlekile. Wentani na? Ubonakalisa umfanekiso weMelusi wetimvu lolungile, etama kuzuza lowo mphefumulo ubuyelete emuva. Noma kunjalo, babalekela endzaweni letsite, mnaketfu, njengekutsi bebatodzabula live, ngebusuku bunye. Lowo melusi utohamba nabo, kute abatfole bakahle, abazuze ngco babuyelete emuva ngco ngalendlela futsi. Lowo ngumelusi lolungle. Ubonakalisa umfanekiso waJesu.

<sup>95</sup> Mnaketfu, ngiyati kutsi kutsiwa kweduka. Kubitwa ngenshisekelo leyecile. Kodvwa uma benginekutikhetsela kutsi ngikwente, kusihlwa, kukhetsa kwami bekuyoba kufana naYe. Ngifuna, uma nomayini emphilweni yami, kubonakalisa umfanekiso weNkhosi Jesu, kuphila kwami.

<sup>96</sup> Ngiyahamba, emvakwakusasa ebusuku, emvakwalomshado, ngihamba ngiyongena ehlane. Ngicondze kuhlala lapho, ngoba, phansi le emphefumulwene wami, ngitivela kutsi ngidzinga kuhamba edvutane naNkulunkulu, kunaloko lengingiko. Angifuni kuhamba nje. Ngitama kuhamba kahle, embikwaKhe, kodvwa ngi—ngifuna kuhamba edvutane naYe. Ngesikhatsi liTabernakeli laBranham lisenemvuselelo, ngifuna yinye, mine lucobo. Angikufuni nje kwenteke esakhiweni. Ngikufuna kwenteke kimi. Ngifuna kuhamba edvutane. Ngifuna lokunengi kwaMoya loyiNgcwele kimi, kubonakalisa Khristu kimi. Ngifuna kufana naYe. Ngiyati kutsi wonkhe umKhristu weliciniso—weliciniso ufunu kufana naYe. Loko kusifiso senhlitiyo yami, kufana naJesu. Yena...Ngani, ngifuna Yena kuba abe wami...Ngifuna Yena kutsi abe...Usibonelo saloko lengifuna kuba ngiko.

<sup>97</sup> Futsi, bukani, kuyobita Moya loNgcwele kwenta loko. Nguleyontfo kuphela lengakwenta. Angiwakhatsaleli emasemina naloko lomunye umuntfu latongitjela kona. Anginandzaba nekucabuza sitfombe semfanekiso waJesu

esiphambanweni, noma utisondzete enhlitiywени yakho, noma usho imikhuleko kulabafile. Ngikhatsalele intfo yinye, loko kutsi, lokunengi kwaMoya loyiNgcwele kutsi atsatse indzawo yaWilliam Branham. Angikukhatsaleli kujoyina libandla lelikhulu kunalelo lengiwalo. NgiweliBandla sibili laNkulunkulu lophilako, liTibulo. Ngatalelwa kuLo. Futsi ngifuna lokunengi kwaMoya loNgcwele emphilweni yami, kubonakalisa Khristu Lengimtsandzako. Anginandzaba kutsi nguyiphi indiza noma lizinga lengifanele ngite ngalo, kute ngikutfole. anginandzaba noma kufanele ngihambe *lapha* noma ngiye *laphaya*, ngibitwe nga “lonenshisekelo leyecile, umgiciki longcwele,” noma kungahle kubeyini. Ngifuna lokunengi kwekuPhila kwaKhe kutsi kubonakaliswe. Angiyikhatsaleli indiza lengifanele ngite ngayo. Ngikhatsalele Moya loNgcwele, ngako-ke ngingaba yinceku kakhulu njengoba Bekanjalo. Bekayinceku yeNkhosi. Akazange afikele kutsi akhontwe, noma kutsi ukhontwe yena, akazange ete ngoba ufanele Akhontwe. Kodvwa, kukhonta, Watsatsa indzawo yenceku.

<sup>98</sup> Futsi uma iNkhosi yaseZulwini ingenta loko, futsi singemalunga eMtimba waKhe, sonkhe asibenjalo; singehluki, kodvwa sititfobe eBukhoneni baKhe. Kungenandzaba kutsi live litotsini, noma bantfu labahlakaniphile, bangacabangi lutfo ngaloko. Yemukela nje lokunengi kwaMoya loNgcwele, futsi ufane naJesu. Ngekutfobeka, bumnene, kutehlisa, tsatsa indzawo yaKhe, futsi Utotsatsa yakho ekwaHluleweni.

Asikhotsamise tinhloko tetfu umzuzwana nje.

<sup>99</sup> Ngingabona, kusihlwа, licembu letandla kulesakhiwo, semalunga alelibandla nalamanе emabandla na? Uma ngitsi, “lelibandla,” ngishо kупhela... Kunalinye kупhela liBandla, lelo liBandla leMntfwana lomusha, liBandla leliTibulo, liBandla laJesu Khristu, longatalwa emhlabeni, kodvwa lotelwe ngaMoya waNkulunkulu. Ngingasibona sicuku setandla tiphakama, futsi utsi, “Nkulunkulu, ngente njengaJesu. Ngibumbe, O Nkhosi. Ngihlante, O Nkulunkulu”? Nkulunkulu abusise tinhilityo tenu. “Ngihlante, futsi ngiyoba mhlophe kunelichwa.”

<sup>100</sup> “Nkhosi, kunemafindvo lamancane nemajika emphilweni yami. Bengikadze ngihleti, ngilalele uMnaketfu Parnell, neMnaketfu—uMnaketfu Neville nalabanеye bafundisi labakahle, neMnaketfu Collins nalabanengi balabo bazalwane labashumayelako. Bengisolo ngilalele. Kodvwa, Nkhosi, kusihlwа, ngita nje kulesipheto lesi: Bangitjelani na? Yini labetama kuyindlulisela kimi na? Ngiyabona kutsi batama kungenta ngifane naJesu. Futsi ayikho indlela kimi kutsi ngikwente ngayo. Ngi—ngiyingwe. Nginemabala, futsi, uma ngiwakhotsa, ngiwenta nje abe mhlophe ngalokwendlulele. Avele acace kakhulu eveni. Nkhosi, angilahlekelwe bungimi lucobo. Anginandzaba kutsi hloboluni lwenyakanyaka lokubukeka kufana nayo, eveni. Ngifuna kutilwa kabusha,

ngaMoya waNkulunkulu. Futsi ngifuna Wena, Nkhosi, kutsi ungigcwaliise, kusihlwa, ngaMoya waKho loyiNgcwele. Ngihlante. Ngingcwelise. Tsatsa iNgati yaJesu, ngingcwelise, ngihlante. Futsi ungigcwaliise, ngize ngilahlekelwe bungimi lucobo, futsi ngibutfole, Nkhosi, kuWe.”

<sup>101</sup> O Nkhosi Nkulunkulu, Mdali wemazulu nemhlaba, Lowavusa futsi iNkhosi Jesu kulabafile, waMletsa ngaMoya lophilisako waNkulunkulu loPhakadze, wavusa lowo mtimba Lowawuhlala kuwo, futsi wuwuvusela esiHhalweni sebukhosи seliZulu.

<sup>102</sup> Uba ngulophansi kunabo bonkhe lobekakhona emhlabeni, ingwadla, futsi uba sikhonti lesiphansi kunato tonkhe, waya edolobheni leliphansi kunawo onkhe, wasebentana nebantfu labaphansi kunabo bonkhe, wemukela ligama leliphansi kunawo onkhe, futsi waba yindvodza lephuye kunabobonkhe. Ngisho nasemvelweni, “Tinyoni tinetidleke, netimpungushe tinemigodzi, kodvwa iNDvodzana yemuntfu yayingenayo indzawo yekucamelisa inhloko yaYo.”

<sup>103</sup> Futsi, noko, lowoMoya lophilisako Lowahlonipha leyoNceku yeliciniso leyatenta Yona lucobo sikhonti, kutsi singahle sibe nesibonelo kuhamba ngaso, WaMvusa emidzbini yesihogo, wangeniswa ngelithuna. Futsi wakhipha lowo mtimba, futsi wawubeka emaZulwini emazulu, waze Waphakanyiselwa kulelisetulu kakhulu waze Wadzingeka kutsi Ubuke phansi kute abone emazulu. Futsi uMnika liGama lelingetulu kwemagama onkhe letsive, kokubili emazulwini nasemhlabeni.

<sup>104</sup> Nkhosi, kwangatsi singemukela Moya waKhe, kusihlwa. Kwangatsi loko kungaba kulamba kwayoyonkhe inhlitiyo lesekhatxi lapha. Wena utibonile tandla letiphakamile, Nkhosi, kungesiko kusho tivumokholo, noma kungesiko kujoyina emabandla, noma—noma kuphikisana etikwaleti tintfo *leti*, noma *loko*, kodvwa kutfobeka etinhlitiyweni tetfu, kwentiwa sifane nemfanekiso waNkulunkulu. Kwangatsi kungentixa ngaMoya loyiNgcwele, Nkhosi. Kwangatsi uMoya loyiNgcwele waNkulunkulu ungasenta. Hhayi ngemcondvo wekuhlakanipha, kutsi, “Sifanele sibe, futsi sitokwenta njengako,” kodvwa, lowo ngumntfwana lofakwe esiswini. Kodvwa, Nkhosi, kwangatsi kungenteka impela ngaMoya loNgcwele, nekuTalwa lokusha lokusiguculako, ngekuvuselela kabusha kwa . . . kwamoya wetfu, kusenta sifane naYe.

<sup>105</sup> Vani umkhuleko wami, Nkhosi. Ubutsakatsaka. Ngiyati, Nkhosi, ubutsakatsaka. Kungesiko kuphela kutsi ngikhulekela lapho ababambe tandla tabo, kodvwa ngetandla tami lucobo letiphakamisiwe. Ngente ngifane naYe. Nkulunkulu, kungenandzaba kutsi Ufanele wente ini kimi, ngutiphi tindiza lengifanele ngite ngato, ngente ngifane naYe. Ngifuna kufana naJesu, enhlitiywani yami. Siphe kona, Nkhosi. Futsi hhayi mine

kuphela, kodvwa wenta bonkhe lapha, kusihlwa, ngaleylo ndlela. Siphe kona, Babe, ngoba sikucela eGameni laJesu. Amen.

<sup>106</sup> Bulunga beliBandla bulungile. Angikamelani nalutfo nabo noma nguyiphi yaletu tintfo. Kodvwa, mnaketfu, kuba ngumKhristu, kusho kufaniswa nemfanekiso waKhristu. Sifuna kuba yimifanekiso lephilako; hhayi kutfwala umfanekiso, kodvwa ube ngumfanekiso weNkhosi Jesu.

<sup>107</sup> Kukhona liculo lelincane lengifuna nine kube ningisite kutsi ngilihlabele manje. Angati. Angikwati kulihlabela, kodvwa ngicinisekile kutsi nonkhe ningakwati. Ngisiteni. *Kufana NaJesu*. Bangakhi labake baliva na? [Libandla litsi, “Amen.”—Umhl.] Ngiyati kutsi sonkhe sifuna kuba ngaleyondlela, ngako asihlabelele Yena.

<sup>108</sup> Nginemuzwa kutsi Moya loyiNgcwele lomkhulu ulapha. Bewungeke ukhone kutifihla. Davide watsi, “Ngendlala umbhedze wami esihogweni, kepha noko Utobe akhona.” Futsi Utoba kuyo yonkhe indzawo. Ngako, Ukhona lapha, kusihlwa. Wati wonkhe umnyakato, tonkhe tenteko, konkhe lesikwentako, konkhe kubukeka, yonkhe imicabango. Wati konkhe ngako. Anikukholwa loko na? [Libandla litsi, “Amen.”—Umhl.]

Kufana naJesu, kufana naJesu,  
Emhlabeni ngilangatelela kufana naYe;  
Kulolonkhe luhambo lwekapuhila kusuka  
emhlabeni kuya eNkhatimulweni  
Ngicela kuphela kufana naYe.

<sup>109</sup> Anikutsandzi yini loko? [Libandla litsi, “Amen.”—Umhl.] Lalelani loku manje:

Emkhombeni waseBhethlehema kwavela  
Sihambi,  
Emhlabeni ngilangatelela kufana naYe;  
Kulolonkhe luhambo lwekapuhila kusuka  
emhlabeni kuya eNkhatimulweni  
Ngicela kuphela kufana naYe.

<sup>110</sup> Niyati kutsi yini abuya engcondvweni yami khona manje? Itolo, ngicoshe libhuku lelidzala lelibandla. Sekube... Angilibonanga. Yebo-ke, ngalokusobala, sikhatsi sekucala lengake ngalibuka. Ngadzingeka ngilisebentise lapho libandla lacala kusungulwa. Futsi kwakukhona ligama leMnaketfu Seward lapho, futsi kwakukhona uMnaketfu George DeArk, neMnaketfu Weber, onkhe lawo magama lapho. Ngibone phansi, emaklasi aSontfo sikolwa lamancane. Ngibone umnikelo wetfu sewuwonkhe, wemaklasi lasihlanu, bewulidola nemasenti langemashumi lasitfupha, walelitabernakeli, nemakhulu lahleti lapha; lidola nemasenti langemashumi lasitfupha. Niyabona na? Khona-ke ngibuka lishathi lanamuahla. Ngacabanga, “Bangakhi labangasekho!” Ngibone uMnaketfu Frank Broy lapha, ma. Lowo ngubabetala wami. Ngibone yonkhe lemisizi,

Nkt. Weber. Yonkhe leyo misizi, yonkhe seyikhwele liladi, bayo eSitezi lesingetulu. Bonkhe abasekho. Ngikhumbula ngesikhatsi sasivamise kuma lapha. Futsi ngacabanga, “Nkhosi Nkulunkulu, libandla letfu lingabukeka lincono kancane, futsi silindzele kwakha linye, kodvwa, Nkhosi, Usasitsandza manje kunanjengoba Wenta ngaleso sikhatsi na?” Cha, angikholwa kutsi Usasitsandza.

<sup>111</sup> Lapho sasivamise kuma futsi sihlabele, “Kuphela ngilangatelela kufana naYe, konkhe eluhambeni lwekuphila.” Ngiyambona George lomdzadlana nakhololo wakhe avuleke kanjalo, nemjuluko ugeleta kuye, ahluta liduku lakhe emkhatsini weminwe yakhe. Ngiyababona labo labatsandzekako, buso lobudzala lobungcwelisiwe emuva lapho, bakhala, netandla tabo tiphakeme.

<sup>112</sup> Bashumayeli bahamba bangena esakhiweni base batsi, “Yeyi, mfana! Ubatfola kanjani bantfu basekuvumelaneni lokunjalo na?”

<sup>113</sup> Ngatsi, “Angikaphatselani ngalutfo nako. Babunjwa futsi baguculelwa emfanekisweni waNkulunkulu, phansi ebbentjini lelidzala letimvutfu telisaha, phansi ngaleya ndzawanatsite, lapho batfola Khristu enhlitiywensi yabo.”

<sup>114</sup> Liphunga lelimnandzi kangaka pho, leyo mikhuleko, njengoba likhuphukile, njalo njalo, busuku bonkhe. Ngalesinye sikhatsi besingangena, futsi siye endlini yalomunye nalomunye, futsi siye ekhaya emini; sikhuleke busuku bonkhe. Asisabutfoli lobo bucotfo nhlobo. Kubonakala kungatsi konkhe sekuhambile. Yini indzaba na? Yini indzaba na? Asibuyele emuva elutsandvweni lwekucala lesasinalo.

Futsi nje kufana naJesu, kufana naJesu,  
Emhlabeni ngilangatelela kufana naYe;  
Kulolonkhe luhambo lwekuphila kusuka  
emhlabeni kuya eNkhatimulweni  
Ngicela kuphela kufana naYe.

Bewungakwenta impela na? Asicule netandla takho tiphakeme.

Kufana naJesu nje, kufana naJesu,

<sup>115</sup> Ufana nemfanekiso waKhe!

E... (Nitsandzana lomunye nalomunye.) . . .  
kufana na . . .

Singemalunga eMtimba waKhe. Simele sifane naYe.

Kulolonkhe luhambo lwekuphila kusuka  
emhlabeni kuya eNkhatimulweni  
Ngicela kuphela kufana naYe.

<sup>116</sup> Ngabe nikusho mbamba yini loko? Tsanini, “Amen.” [Libandla litsi, “Amen.”—Umhl.] Manje lowo akusiwo

yini umoya lomnandzi na? Nginganconota kuba na Ko kunanoma yini lengiyatiko eveni. Ngi...Ungatsatsa konkhe kwemhlaba, nebuukhatikhati bawo, tihlakaniphi takho tonkhe, bodokotela bakho bonkhe, borabi, babbishobhi, bobabe labangcwale. Ngiphe Jesu. Kunjalo. Angibe naYe nje, leyondlela leyimfashini lendzala. NgiMuva phansi enhlitiywensi yami, futsi abheke timphilo tami, futsi abone tifiso tami tikuMkhonta, ngitfobekile, ngimnene futsi ngiphansi. Nguloko lesikudzingako, bangani. Ngabe re-...Lowo nguJesu. Lowo nguJesu weliBhayibheli. Hhayi Jesu walabanebuhlakaniphi, kodvwa Jesu wemphefumulo. Ulapha, kusihlwa.

<sup>117</sup> Bangakhi labagulako nalabadzingile? Phakamisani tandla tenu, lodzinga Khristu. Uyagula futsi ufuna kukhulekelwa? Phakamisani tandla tenu, etulu, kute ngikhone kubona kutsi ungubani.

<sup>118</sup> Yebo-ke, bangakhi lonesifiso enhlitiywensi yabo, kukhulekela lomunye umuntfu logulako na? Ake sibone tandla tenu tiphakama. Kulungile. Kunalabambalwa impela babo.

Bangakhi lokholwa kutsi Jesu usenguye?

<sup>119</sup> Asinawo emakhadi emkhuleko laphumile. Angi...Kute emakhadi emkhuleko, akhona yini? Angicabangi kutsi bekakhona.

<sup>120</sup> Uyakholwa yini kutsi Jesu uMsindzisi wetfu angafika, kusihlwa, kitsi na? Futsi uma sihlabela, futsi ngikhuluma ngekubonakalisa umfanekiso waKhe, Bekayokwentani kube Bekeme lapha na? Ucabanga kutsi Bekayokwenta njengoba Enta kuJohane 4, lapho Abona wesifazane emtfonjeni, futsi wamtjela, ati kutsi yini leyayisenhlitiywensi yakhe, wase umchazela kona, futsi wamtjela na? Futsi bekati kutsi BekanguMesiya. Niyakukholwa loko na? [Libandla litsi, "Amen."—Umhl.] Kholwani kutsi lowo Jesu lofanako kutsi—kutsi ungumPhristi loMkhulu...[Akucoshwangwa etheyiphini]...sandla saNkulunkulu. Ukholwa ngulowo Jesu lofanako, kusihlwa, lohamba ngalapho ngalololunye lusuku...

<sup>121</sup> Futsi kwakungekho mugca wemkhuleko, kodvwa kwakukhona wesifazane lomncane lobekanemopho. Wacindzetela esicukwini waze watsintsasembafo saKhe, wabuyela emuva wase uhlala phansi. Futsi Jesu wajika wase utsi, "Ngubani loNgitsintsile na?" Uyakholwa kutsi Jesu usenguJesu lofanako nanamuyla? Futsi sifiso salowesifazane, enhlitiywensi yakhe! Niyabona, bekesaba. Wabuyela emuva wase uhlala phansi. Walindza. Futsi Jesu watsi, "Ngubani loNgitsintsile?"

<sup>122</sup> Futsi i—i...Petro, umphostoli, waMekhuta, watsi, "Nkhosi, ngani, wonkh'umuntfu uyaKutsintsasimosi!"

<sup>123</sup> Watsi, "Yebo. Kodvwa loku bekukutsinta lokwehlukile. Emandla aphumile kiMi. Ngi—Ngikuvile." Futsi Wacalata yonkhe indzawo, etetsamelin, waze Wabona lowo wesifazane

lomncane. Futsi Wamtjela kutsi bekanemopho futsi kukholwa kwakumsindzisile.

<sup>124</sup> Ngabe lowo nguJesu yini? [Libandla litsi, “Amen.”—Umhl.] Beku... Singatitfoba tsine lucobo, kusihlw, futsi siguculwe ngekuvuselela kabusha kwamoya wetfu, ngaMoya loyiNgcwele, kutsi singanikela tindzebe tetfu, emehlo etfu, nekukholwa kwakho, nekukholwa kwami, kutsi Utophuma etetsamelimi futsi ahambe ngekhatsi kuwe, futsi ahambe ngekhatsi kimi, kugewalisa Livi laKhe, kutsi UngumPhristi loMkhulu wekuvuma kwetfu na? Uhleti ngesekudla saNkulunkulu, kwenta kuncusel etikwekuvuma kwetfu. Futsi ungumPhristi loMkhulu longatsintfwa ngendlela lefanako leBekangyo ngesikhatsi Alapha emhlabeni, ngekuvelana nebutaksaka betfu. Niyakukholwa loko na? [“Amen.”] Lowo Jesu lofanako.

<sup>125</sup> Bangakhi ekhatsi lapha lonesidzingo sakho noma lomuny’umunfu, labanye benu lengingamati, lomuny’umunfu lowatiko kutsi angikwati loko na? Ngitokusho kanjalo. Angati lutfo ngawe noma sicelo sakho. Kodywa uyakholwa kutsi Jesu ulapha kutifakazela Yena lucobo, kutenta Yena lucobo abonakale kitsi, kutsi asebente kitsi ngendlela lefanako Lenta ngayo ngesikhatsi AkuJesu Khristu. Niyakukholwa loko na? Phakamisani tandla tenu, nomangubani kini lowatiko kutsi angikwati manje. Niyabona na? Angikwati.

<sup>126</sup> Yebo-ke, ake sibone. Ngukuphi lapho singagcila khona, kwekucala? Manje banini nenhloniph yekutitfoba. Uma Atokwenta loku, ngabe nitoMkholywa, ngenhlitiyo yenu yonkhe na? [Libandla litsi, “Amen.”—Umhl.] Niyabona na? Ngitivela nje... bengitonibitela etulu lapha futsi ngibeke tandla kini. Angikholwa kutsi ngitokwenta loko. Ngikhholwa kutsi Jesu ulapha.

<sup>127</sup> Tsine, kungesiko ku—kungesiko kutfwala umfanekiso waKhe, kodywa sibe ngumfanekiso waKhe. Ngulowo Jesu lesimfunako. Akunjalo na? Kuba ngumfanekiso! Kulungile.

<sup>128</sup> Manje, Nkhosi Nkulunkulu, nasi sitatimende lesikhulu. Kodywa nguWe, Nkhosi, Lowenta setsembiso. Manje simele sicindzetele phambili. Manje kufanele kwentiwe lokutsite, naloku nje singesilo ngisho nelihlelo. Singulabancane nje, labatfobekile, sicuku lesimphofu sebantfu labashayisiwe, kutsi, labanengi betfu bayokhahlelwa bakhishelwe ngephandle kwalamakhulu, emabandla lahlakaniphile. Kube besihamble, besingeke sikhone kugcoka njengoba benta. Futsi-ke, lenye intfo, uma besingasukuma, naMoya bekayobusisa futsi besiyotsi, “Amen,” njengoba imiBhalo isho, besiyokwaliwa, masinyane. Futsi labanengi bebangeke bemukelwa: labanye babo, nganca yelibala labo; labanye babo, nganca yesivumokholo sabo; labanye babo, nganca yekutsi batsandza Wena kakhulu kakhulu.

Futsi ba—banaMoya. Bafile etintfweni telive, futsi batelwe kabusha. Kodvwa banekuPhila lokusha, iMphilo yenceku.

<sup>129</sup> Kodvwa sibutsene lapha, Nkhosi, ngaphansi kwaloluphahla loluncane Losiphe lona, loko siyakutsakasela. Manje, Nkhosi, akwateke kutsi UnguKhristu, lofanako, nekutsi lona Lomkhulu lesikhulumu ngaye, Ukhona manje kwatisa nekwenta njengoba nje Enta ngesikhatsi Alapha emhlabeni. Siphe kona, Babe, kutsi bangahle babone futsi bakholwe. Ngoba ngikucela eGameni laJesu. Amen.

<sup>130</sup> Uyakholwa kutsi, loko lokucelako, uyakutfolna na? Kuyini kukholwa? Kukholwa kuliciniso. Kukholwa yintfo letsite lowati ngayo kutsi ingiyo. Kukholwa akusiyointfo loyicagelako. Kukholwa nguloko lokwatiko, niyabona, intfo letsite leyehlela emphefumulweni wakho.

<sup>131</sup> Ngifisa labo labangangati, futsi angikwati, futsi noko usenesicelo noma sifiso, ningaphindza niphakamise tandla tenu. Ngifuna nje kutfola u—umcondvo lovamile, wonkh'umuntfu losekhatsi lapha lengingamat. Kulungile. Kukuyo yonkhe indzawo nje. Angitsandzi kukhulumu kubantfu lengibatiko, ngoba labanye batotsi, "Uyabati." Kodvwa kunetandla letinengi letiphakamile, lebengingatati. Manje, uma iNkhosi Jesu itopha loku, ngabe nonkhe nitokukholwa ngenhlitiyo yenu yonkhe, futsi nemukele kophiliswa kwenu futsi noma kungahle kube yini na? [Libandla litsi, "Amen."—Umhl.]

<sup>132</sup> Ngiyacela, ake—ake nje, etinhlitiyeweni tetfu, sikhuleke, "Jesu susa konkhe kungabata." Ngani, Jesu akangabati. Uma sisemfanekisweni waKhe, siyakholwa. Wamkholwa Nkulunkulu. Uta kutokwenta intsandvo yaNkulunkulu. Akakhatsalelanga kutsi umuntfu watsini, noma lomunye umuntfu watsini. Utela kutokwenta intfo yinye: kuba sikhonti kuBabe waKhe. Futsi Babe waKhe wahlala kuYe. Sita kuba yinceku yaNkulunkulu. Moya loyiNgewe uhlala kitsi. Sifuna kuMkhonta.

<sup>133</sup> Ngitogcila kulowesifazane, we—wesifazane lolikhalatsi ahleti emuva ngco lapha. Ngikholwa kutsi uphakamise tandla takhe, kutsi bengingamati lowesifazane. Kukutsi—kutsi... Yebo-ke, kukhona lababili babo lapho. Kulungile. Akekho ngisho namunye kini bodzadze longatiko, noma lengimatiyo? Uma loko kunjalo, phakamisani tandla tenu, kutsi angikwati. Phakamisa tandla takho. Kulungile. Kulungile. Sitihambi kulomunye nalomunye. EmBhalweni, kwakhulunywa... Sizatfu ngicaphela, ungu... Benibantfu labangemakhalatsi. Uyabona na?

<sup>134</sup> Kwakukhona wesifazane, ngalesinye sikhatsi, eBhayibhelini, sahluko se 4 saJohane loNgewe. Jesu wefika emtfonjeni, futsi kwakukhona wesifazane longumSamariya. Bekangu—nguvesifazane weluhlanga lolwehlukile. Futsi Jesu

wakhulumu kuye, imizuzwana lembalwa nje, waze Watfola kutsi yayiyini inkhatsato yakhe, wase umtjela kutsi yayiyini inkhatsato yakhe. Futsi lapho Sekamtjelile inkhatsato yakhe, watsi, “Mnumzane, ngiyabona kutsi ÜngumProfethi. Manje, siyati, lapho Mesiya efika, Utositjela letintfo leti.” Kodvwa abazange bacondze kutsi Bekangubani. “Ngani,” watsi kuYe, “ungubani Wena?”

Futsi Jesu watsi, “NginguYe, lokhulumu kuwe.”

<sup>135</sup> Wabuyela edolobheni, lapho avela khona, wase utsi, “Wotani, nibone uMuntfu Longitjele tintfo lengitentile, wangitjela kutsi yini lengakalungi. Akusuye yini yena kanye loMesiya na?”

<sup>136</sup> Ngabe nine besifazane nake nakufundza loko na? Impela. Johane loNgcwele, sahluko se 4. Yebo-ke, uma... Jesu unguye itolo, namuhla, naphakadze. Futsi nime emayadi langemashumi lamabili kusuka kimi, noma nihleti, njalo. Niyakholwa kutsi Jesu lofanako, lokhulumu emkhatsini wetfu, angembula kimi loko lenikufunako, kusuka lapha na? Uma nginitjela liCiniso, leliBhayibheli licinisile, Angakwenta, Angeke yini akwente? Uma Atokwenta, nitokukholwa na?

<sup>137</sup> Lowesifazane ekugcineni, longibukako, ngalendlela, uhlushwa yinkhatsato yelicolo lafuna kophiliswa kuyo. Loko kunjalo impela. Uma loko kunjalo, phakamisa sandla sakho, dzadze losekugcineni. Nako lapho ukhona.

<sup>138</sup> Manje kutsiwani ke ngawe, dzadze? Uyakholwa, nawe na? Ngiyakholwa kutsi utsite usihambi kimi, futsi, ecelemi kwakhe. Unenkhatsato ngenhloko yakho. Futsi unenkhatsato yesikhumba, futsi. Uma loko kunjalo, phakamisa sandla sakho.

<sup>139</sup> Manje, hamba ekhaya. Nobabili ningasindziswa. Kukholwa kwenu kunisindzisile.

<sup>140</sup> Niyakholwa kutsi Jesu ulapha, kusihlwa? [Libandla litsi, “Amen.”—Umhl.] Kutsiwani ngalabanye benu, nonkhe lasakhiweni? Kulenyi indzawo, kholwani.

<sup>141</sup> Nangu wesifazane lohleti lapha, akhuleka. Ulichawe. Ngiyamat, kodvwa angikwati kusita ngoba loko kuKhanya kulenga etikwakhe. Lowo nguNkhosatana Bruce. Manje, Nkhosatana Bruce, angati lutfo mayelana nekutsi yini lengalungi ngawe. Wena waphiliswa, unemdlavuza, ngalesinye sikhatsi. Kodvwa khona lapho kulowo mnyango, kwekulala ngake ngatsengisa...ngasho...ngakubona ume kulowo mnyango, Moya loyiNgcwele wangitjela intfo letsite lokungekho muntfu loyatiko ngaphandle kwakho nadokotela. Kunjalo. Akunjalo na? Uyakholwa kutsi Angangitjela kutsi yini lengalungi manje? Ngiyakwati, kodvwa a—angati kutsi iyini inkhatsato yakho. Anginamcondvo. Ngoba, uphilisiwe emdlavuzeni. Kodvwa angikwati kusita loko kuKhanya lokulenga etikwakho. Uyabona na? Kuhleli khona lapho.

<sup>142</sup> Manje, ngibona lomunye umuntfu aphakama. Akusiko kwakho. Kwalomunye umuntfu lonemdlavuza. Kunjalo impela. Bese-ke ngibona wesifazane, noma intfo letsite. Usoni, noma intfo letsite, unemkhuba wekunatsa, noma intfo letsite. Futsi uphetse emaduku lamabili kuwe, kutsi mine ngibeke tandla tami kuwo, kwentela kwabo—kwentela kukhululwa kwabo. Lowo ngu ISHO KANJE INKHOSI. Loko kunjalo impela. Manje bani lijai wena. Ngabe kunjalo na? Uma loko kunjalo, phakamisa sandla sakho.

<sup>143</sup> Lomuny'umuntfu emuva ekhatsi *lapha*, lengingamati, phakamisa sandla sakho, lomuny'umuntfu lengingamati. Lapha, kukhona... Kuyini loko? Phakamisani tandla tenu futsi, khona lapho ekoneni. Kunebesifazane labane noma labasihlanu labahleti lapho. Niyangikholwa kutsi ngiyinceku yaKhe? Niyaholwa kutsi loko lenikubonako kusebenta ngaMoya waNkulunkulu na? Niyaholwa na? Uma ningakholwa.

<sup>144</sup> Lowesifazane lohleti, abuka nami, nesigcoko lesincane, agcoke tibuko, emacici labukeka amhlophe. Yebo. Akusiko kwakho. Kwalomuny'umuntfu, futsi basesimeni lesibucayi. Kukophela ngekhatsi. Basesibhedlela. Leso sibhedlela yiNew Albany. Lelo liciniso. USHO KANJE MOYA LONGCWELE.

<sup>145</sup> Lowesifazane losemusha, ngabe bewuphakamise sandla sakho? Lowesifazane, *lolu* lolunye luuhlangotsi, angibukile ngalenddlela, uyangikholwa na? Unesifiso enhlitiywени yakho. Uyakholwa kutsi Nkulunkulu angakwembula kimi? Kulungile. Ukhulekela lomuny'umuntfu, futsi. Ngumuntfu lotsite loneludvwadywasi emehlwani abo. Bayesaba kutsi batophumphutseka. Lelo liciniso. Manje, uma utomkholelwa, ngeke aphumphutseke uma utokukholwa.

<sup>146</sup> Lowesifazane ngalokucondze ngco emuva, ekupheleni lapho, emuva ngemuva kwalowesifazane lophakamise sandla sakhe. Unesimo sekwfetfuka. Kunjalo. Kwetfuka kwakho kusemphinjeni wakho. Kunjalo. Akunjalo na? Khona-ke phakamisa tandla takho uma leto tintfo tinjalo. Nine besifazane lapho, ngiyakhulum. Kulungile.

<sup>147</sup> Bekungubani lowo wesifazane lolandzelako lapho na? Ngabe bewuphakamise sandla sakho, nawe, dzadze, lapho? Phakamisa sandla sakho, lowo losakhulile... Kulungile. Unekuvuvuka kwemalunga lofuna kukhulekelwa kona. Kulungile. Akunjalo na? Phakamisa sandla sakho. Uyakholwa na?

<sup>148</sup> Lomuny'umuntfu—lomuny'umuntfu lengemuva kwelibandla, kholwa, bani nekukholwa.

<sup>149</sup> Ngibona wesifazane longibuke ngco, ubuke emkhatsi webesifazane lababili khona lapha. Unemuno wakhe etulu emlonyeni wakhe. Ubhekene nekuhlindvwa, kwa-phambukane. Kunjalo impela. Uma loko kunjalo, phakamisa sandla sakho, dzadze. Nango ke lapho.

<sup>150</sup> Niyakholwa na? [Libandla litsi, “Amen.”—Umhl.] Kuyini na? NguJesu Khristu, iNdvodzana yaNkulunkulu. Niyakholwa ngayo yonkhe inhilitiyo yenu na? [“Amen.”]

Manje, umzuzu nje, dzadze.

Kufana naJesu, kufana naJesu,  
Emhlabeni ngilangatelela kufana naYe;  
Kulolonkhe luhambo lwekuphila kusuka  
emhlabeni kuya eNkhatimulweni  
Ngicela kuphela kufana naYe.

<sup>151</sup> Manje nibona kufa kwelibandla lwalolusuku. Yini lebeyitokwenteka etinsukwini teNkhosi Jesu, lapho kwenteka na? Loyo wesifazane, ajabule ngalokwecile, wawisa imbita yemanti, wase ungena edolobheni. Watsi, “Mesiya ulapha!” Kodvwa, namuhla, yebo, anikabi nhlakanhlaka ngalokwenele, phansi e-altari, kwemukela kuTalwa lokusha namanje. Kukhona lokutsite lokungakalungi ndzawanatsite. Lobekuyotfumela Moya loyiNgcwele wendlule kulendzawo lapha, lobekuyotfumela imvuselelo, kubonakaliswa kwaJesu Khristu, umfanekiso waKhe uvunyiswe lapha, uhamba emkhatsini webantfu, kwenta loko. Yini indzaba na? Kukhona lokutsite lokushodako. Sidzinga imvuselelo.

<sup>152</sup> Bangakhi labanye labagulako na? Phakamisani tandla tenu, nine lenigulako nalabadzingile.

<sup>153</sup> Bekani tandla tenu kulomunye nalomunye. Asikhuleke. Ngekushesha khona manje, bekani tandla tenu etikwalomunye nalomunye, nilungele kwemukela kophiliswa kwenu. Uma nitokholwa ngenhilitiyo yenu yonkhe, ningaphiliswa khona manje.

<sup>154</sup> Ngamangala. Sasikhulumu ngewesifazane, kutalwa. Angikaze ngibe nako namanje, emphilweni yami, wesifazane munye, njengoba ngati ngaye, ahamba njalo ngembili, afisa luswane... Kwentekani na? Uma ngingambona, futsi ngikubone kwenteka, sifiso sakhe sekulangatelela intfo lefanele, ngitsi kuye, “Dzadze, ufunu luswane.”

Yena, “Yebo, Mnaketfu Branham.”

<sup>155</sup> Ngiyamati wesifazane, iminyaka lengemashumi lamane nemfica budzala, uneluswane lwemfana manje. Yonkhe imphilo yakhe, bekahlala nalendvodza kusukela, yebo-ke, kusukela cishe iminyaka lelishumi nesitfupha budzala. Uneminyaka lengemashumi lamane nemfica, futsi lowesilisa unemashumi lasihlanu nentfo. Ngekushesha nje lapho atsite, “ISHO KANJE INKHOSI. Kunjalo, utawubanalo loluswane.” Waya ekhaya wase utsenga timphahla teluswane. Iminyaka lemitsatfu kamuva, sekaneminyaka lengemashumi lasihlanu nakubili budzala, wabeleka umfana lomcane lebekasolo alangatelele kuba naye. Ngani na? Ngesikhatsi alive likhulunya, bekti kutsi kwakufanele kwenteke. Kwentani na? Kwambeka esimeni

sekwemukela lesifanele. Uma laba . . . Moya loyiNgcwele ulunge kakhulu kutsi efike futsi akhulume letintfo leti kubantfu. Uma kutoba . . . Uma utongena esimeni sekwemukela lesifanele manje, kuphiliswa sekucedziwe.

<sup>156</sup> O Nkhosi, UnguNkulunkulu, futsi UnguNkulunkulu kute kube phakadze. Futsi si—sijabule kakhulu kwati kutsi Wena watsembisa kutsi Uyoba nensali uma Sewuta emhlaben. Kungakhatsaleki kutsi kuhambani noma kufikani, kutoba nebantfu labatolungela. Siyati kutsi kunekweshumi umuntu lakunikela kuNkulunkulu. Futsi kukhona kweshumi emkhatsini webantfu. Enceny, mhlawumbe singatsi, kweshumi, kwaso sonkhe sivuno selive eminyakeni, kutoba ngulowo Lokhetsiwe lobitiwe.

<sup>157</sup> O Babe, siyakhuleka, njengoba sisebenta lapha, sonkhe ndzawonye, sifunisia edolobheni, sitama kuletsa toni, sitama kwenta lokutsite kwentela uMbuso waNkulunkulu. Sehlela edolobheni, sibukisisa kunganaki. Siyakubona. Futsi njengaLoti, eSodoma, kukhatsata imiphefumulo yetfu malanga onkhe, kubona labesifazane babbema bosikilidi futsi—futsi batisho kutsi bangemaKhristu, nekunatsa, nekuhuca tjwala, nekugcoka tingubo tesimilo lesibi. Ne—nemadvodza akhanuka. Futsi, o, sono saseSodoma! Tinhlitiyo tetfu tiyadzabuka ngekhatsi kwetfu, Nkhosi.

<sup>158</sup> O, akumangalisi kukholwa kufika ekwehlulekeni, lapho bantfu banjalo, bete iNgati yaJesu. Lebeyitongcwelisa imiphefumulo yabo futsi ibokhele ngemlilo waNkulunkulu, kepha noko ngeke bakwemukele. Futsi timishini letincane emakoneni, tekushaya emathamborini netigubhu, tisemakoneni abo, futsi bayasihleka singenisa tinceku taNkulunkulu lophilako.

<sup>159</sup> O, siKubonga kanjani, Babe, ngendiza letsite, ndzawanatsite, letoshumayela liVangeli, letolula tandla kwentela bantfu. Siphe, Nkhosi, khona manje sisakhuleka, futsi watu kutsi uMoya waKho loNgcwele lomkhulu netiNgelosi ti—tisetikhundleni tato lapha kulelibandla.

Nkulunkulu, tsetselela sonkhe sono.

<sup>160</sup> Bantfu bayagula lapha, kusihlwa. Kunalabanengi babo. Utibonisile Wena lucobo kuba lapha, Nkhosi, ngetinceku taKho. Letinengi tato ngephandle lapho letifinyelela futsi tibita futsi tidvonsa. Futsi, Nkhosi, Uyati kutsi—kutsi Nguwe kuphela longavumela loku kutsi kwentiwe. UnguNkulunkulu, futsi Nkulunkulu yedvwa, futsi Ukwentela yona kanye inhlos Lowayetsembisa kutsi Bewuyokwenta. Futsi sibonakaliso sekugcina ebandleni, njengoba Wakhulum. Sikhatsi sekugcina sesifikile lapha.

<sup>161</sup> Khona-ke Wena wabuta lombuto, “Ngabe Ngitokutfolo kukholwa uma Ngifikasi emhlaben na?” Awuzange ubute,

“Ngabe Ngitowatfola emalunga elibandla na? Ngabe Ngitotifola tivumokholo na? Ngabe Ngitobutfola bucotfo na?” Wena watsi, “Ngabe Ngitokutfola yini kukholwa uma Ngifika emhlabeni na?”

<sup>162</sup> Nkhosi, kwangatsi labantfu laba labagulako bangavumela kukholwa kwabo kukhululeke, baphume ekucakekeni, nekungabata, nekwesaba. Kwangatsi kukholwa kwabo kungakhululeka manje nje. Futsi uma bakhulula kukholwa kwabo, kugula kutofanele kukhululeke, develi utoyekela kubamba kwakhe, futsi batokhululwa ngeMandla aNkulunkulu Somandla. Akutsi Moya loNgewe afake umfutfo yonkhe inhlitiyo, abhabhatise wonkhe umphefumulo, futsi aphilise wonkhe umtimba loseBukhoneni bebuNkulunkulu. Siphe kona, Nkhosi.

<sup>163</sup> Ngoba loku ngikucela, kutsi develi ashiye wonkhe umuntfu lababahluphako ekhatsi lapha, kusihlwa. EGameni laJesu Khristu, Sathane, tikhulule kulabantfu laba. Njengenceku yaNkulunkulu, ngiyabakhalela, ngibacelela sihawu. Amen.

<sup>164</sup> Bangakhi labakholwa ngenhlitiyo yakho yonkhe manje, ngako konkhe lokukuwe, kutsi Jesu Khristu utibonakalisa Yena lucobo emhlabeni namuhla emkhatsini webantfu baKhe na? NiyaMtsandza na? [Libandla litsi, “Amen.”—Umhl.]

<sup>165</sup> Khona-ke asesihlabele leliculo lelidzala kanye kanye, *NgiyaMtsandza*. “NgiyaMtsandza ngoba Wangitsandza kucala.” Sonkhe kanye kanye, lapho sisasukuma manje. Wonkh’umuntfu manje, sonkhe kanye kanye. Bangakhi labalatiko? Phakamisa tandla takho. *NgiyaMtsandza*. AsiMdvumise manje.

<sup>166</sup> Bonkhe labagulako, bonkhe labahlaselekile, sukuma ume ngetinyawo takho manje, yemukela kuphiliswa kwakho. Ngiyakholwa, futsi ngayo yonkhe inhlitiyo yami. Uma utovumela nje kukholwa kwakho kuhambe, khona manje! Khristu waNkulunkulu, Lokhona, uto...Wentani Yena? Usenta umfanekiso waKhe. Niyabona na? UMoya waKhe lapha, ubonakalisa Yena lucobo ngco kuwe.

<sup>167</sup> Manje, niyati kutsi akusimi. Angibati labo bantfu, noma ngabe bebabobani, lophakamise tandla tabo. Baphakamise tandla tabo, kutsi bebangangati. Futsi ngaphakamisa tandla tami, bengingabati. Kodywa Nkulunkulu uyabati. Kuyini na?

<sup>168</sup> NguKhristu atibonakalisa Yena lucobo. Kukholwa kwakho kukholwa loko. Kukholwa kwami enkonzwensi, kutsi Wakucinisekisa kimi ngeNgelosi; Leyo sitfombe saYo lenisibonako, lesilenga emahholeni etenkholo ebuciko, nalapho Iseveni lonkhe jikelele, Iyatiwa, iNsika yeMlilo leyahola bantfwana baka-Israyeli.

<sup>169</sup> Lapho Wentwa inyama, Yayisesimeni lesibitwa ngeNdvodzana yaNkulunkulu. Watsi, “Ngivela kuNkulunkulu futsi ngaya kuNkulunkulu, ngibuyela kuNkulunkulu.”

<sup>170</sup> Emvakwekufa kwaKhe, kungcwatjwa neluvuko, Pawula wahlangana naYe, asendleleni abheke eDamaseko, ngesimo seNsika yeMlilo, ekuKhanyeni lokwakhipha emehlo akhe. Pawula watsi, "Wena uNgubani, Nkhosi?"

<sup>171</sup> Watsi, "NginguJesu. Kumatima kuwe kukhahlela emanyeva."

<sup>172</sup> Jesu watsi, "Kwesikhashana nje, nelize," i-kosmos, luhlelo lwelive, emalunga elibandla, nalokunye nalokunye, "ngeke lisaNgibona, kepha noko nine nitawuNgibona. Ngoba Mine," sabito selucobo, "Mine, Jesu lofanako, ngitawuba nani, ngisho nakini, kute kube sekupheleni kwemhlaba. Futsi lemisebenti leNgyentako nani nitawuyenta. Lemikhulu kunalena nitawuyenta, ngoba ngiya kuBabe waMi." Amen. O, hhe!

NgiyaMtsandza, ngiyaMtsandza  
 Ngoba Wangitsandza kucala  
 Futsi wangitsengel'insindziso  
 Esihlahleni saseKhalvari.

<sup>173</sup> O, lapho sisahlabela lelo futsi, ngifuna emaMethodisti, nemaBaptisti, nemaPhentekhostali, nemaNazarene, nemaPilgrim Holiness, ichurch of God, nonkhe, nonkhe kanye kanye, ngifuna nine uchawulane nalomunye losembikwakho, nasemvawakho, naseceleni kwakho, lapho sisakwenta manje. Sonkhe kanye kanye.

Ngi...

Nkulunkulu akubusise, mnaketfu, mfundisi.

. . . Mtsandza  
 Ngoba Wangitsandza kucala  
 Futsi wangitsengel'insindziso  
 EKhalvari . . .

<sup>174</sup> Manje lolu luhlelo lweluvuko, "Tsine lesiphilako futsi sisasele asinawubendvulela labo labofile, ngoba licilongo laNkulunkulu liyokhala nalabofile kuKhristu bayovuka kucala. Tsine lesiphilako nalesisele siyohlwitfwa kanye nabo, sihlangane lomunye nalomunye ngaphambi kwekutsi sihlangane naYe. Sihlangane ngaphambi kwekutsi sihlangane naYe, sihlwitfwe ndzawonye kanye naYe, kanye nabo, kutsi sihlangabete iNkhosi emoyeni, sonkhe ndzawonye."

<sup>175</sup> Manje sesihlangene, sachawulana, manje asiMbingelele.

NgiyaMtsandza, ngiyaMtsandza  
 Ngoba Wangitsandza kucala  
 Futsi wangitsengel'insindziso  
 KusaseKhalvari . . .

Nciphisa litubane layo.

<sup>176</sup> Wesifazane losemusha uwe ngco waphuma elayinini, weta akhuphuka ngco wase uguca e-altari, anesibibitfwane futsi akhala. Bebangaba khona labanye lapha labativela lokuvuma loku, lebebangatsanza kuguca naye? Singakujabulela wena kutsi ukhuphuke ute ngco futsi utsatse indzawo. Nkulunkulu akubusise, mnaketfu. Lomunye umuntfu angahamba enyuke ngco? Loko kuhle.

Ngiya . . . (Ngibumbe, Nkhosi, futsi ungente.)  
Ngi . . .

Yehlela endlini yeMbumbi. Lomunye umuntfu lota kutotsatsa indzawo?

. . . ngoba Wangitsandza kucala  
Futsi wangitsengel'insindziso  
Esihlahleni saseKhalvari.

O, aKamangalisi yini? [Libandla litsi, “Amen.”—Umhl.]

<sup>177</sup> Nkhosi lebusisiwe, lona wesifazane losemcane Wena uyamati. Mine angimati. Kodvwa kukhona intfo lengakavami lemshayile emizuzwaneni lembalwa leyendlulile nje, lephuma kuleto tetsameli laphuma kuto, ngaphandle kwekupocelelwa. Lowo bekunguWe, Nkhosi. Uguce lapha e-altari, lapho labatsandzekako basedvute, tandla tabo timgacile. Bacela sihawu, nekucondziswa, nangekucina kwemandla akamoya, kuye. Akwentiwe, Nkhosi. Kubhaliwe, manje akwentiwe, kutsi, “Awunawubabambela lutfo loluhle lohamba ngekucondza phambi kwaKho. Tetsembiso takho tingu yebo na amen, kubo bonkhe labatotsanza Wena futsi batolandzela Wena.”

<sup>178</sup> Vumela wesifazane losemusha ati loku, nakanjani, kusihlw, kutsi akukho lutfo emaZulwini, lokwetsenjiswe eVini laNkulunkulu, ngaphandle kwaloko Nkulunkulu latimisele kakhulu kukutfululela ngco enhlitiyweni yakhe kulesikhatsi lesi. Kwangatsi kungaba khona incenyeney leyenelisako leniketewe yena, ngesikhatsi aguce walala phansi e-altari. Kwangatsi Moya loNgcwele angamupha leto tintfo letifiswa yinhlitiyo yakhe. Siphe kona, Nkhosi, ngoba sicela loku eGameni laJesu.

. . . Wangitsandza kucala  
Futsi wangitsengel'insindziso  
E . . .

[UMnaketfu Branham ukhuluma nalomunye—Umhl.]

<sup>179</sup> Nkulunkulu lotsandzekako, kwangatsi sifiso salona wesifazane angaphiwa sona, ngenza yalotsandzekako wakhe bekamtsandza kakhulu kangaka. Kwangatsi Moya loyiNgcwele lomkhulu angenta umsebenti, kutsi kuphela Angakwenta ngalesikhatsi lesi. Sikunikela konkhe kuWe; khulekela kutsi . . . Kulunga kwakho lokunelutsandvo kuncono kuneckuphila. Davide washo njalo. “Ngenca yekutsi kulunga kwaKho

lokunelutsandvo kuncono kimi kunekuphila, tindzebe tami tidvumisa Wena." Muphe sifiso sakhe senhlitiyo yakhe, Nkhosi.

<sup>180</sup> Njengoba lelibandla, kanye nami, umfundisi waKho, uto... kanye nalabanye bafundisi lokulesakhiwo, ngebucotfo umcelela sicelo sakhe. EGameni laJesu Khristu. Amen.

Siyakubita, dzadze. Akubusise.

<sup>181</sup> Manje lapho labantfu laba basatinikela bona lucobo, batifuna bona, cobolwabo, eNkhosini, lapho Moya waYo asahambahamba kulesakhiwo, ngingatsandza kutsi sime singanyakati umzuzu nje. Umelusi usasebentana nabo e-altari. Asibe semkhulekweni, kwemzuzwana nje manje. Uyeta lapho. Futsi asihlabele manje. Ukhulumu kumuntfu ngamunye.

<sup>182</sup> Asikhotsamise tinhloko tetfu, kute sibe semkhulekweni. [UMnaketfu Branham ucala kuhamisha *NgiyaMtsandza*—Umhl.]

Futsi wangitsengel'insindziso  
Esihlahleni saseKhalvari.

*NgiyaMtsandza*, *ngiyaMtsandza*  
*Ngoba Wangitsandza* kucala  
Futsi wangitsengel'insindziso  
Esihlahleni saseKhalvari.

Ngingakhona, ngiyavuma, ngiyakholwa;  
Ngingakhona, ngiyavuma, ngiyakholwa;  
Ngingakhona, ngiyavuma, ngiyakholwa  
Kutsi Jesu uyangisindzisa manje.

Ngingakhona, ngiyavuma, ngiyakholwa;  
Ngingakhona, ngiyavuma, ngiyakholwa;  
Ngingakhona, ngiyavuma, ngiyakholwa  
Jesus uyangisindzisa manje.

NgitaMtsatsa eVini laKhe,  
NgitaMtsatsa eVini laKhe.  
Uletsu kimi insindziso ngesihle  
Futsi ngitaMtsatsa eVini laKhe.

Ngingakhona, ngiyavuma, ngiya...

<sup>183</sup> Buka lapha, mfo lomncane. Ufuna kuhamba lokujulile naNkulunkulu na? Uyakholwa kutsi Utokunika khona na? [Umnaketfu utsi, "Yebo."—Umhl.] Uma utokholwa ngenhlitiyo yakho yonkhe, ungaba nako. Uyabona na? Uyakukholwa na? ["Yebo, mnumzane. Ngiyakholwa."] Kwemukele na? ["Yebo, mnumzane."]

... kholwa kutsi Jesu uyangisindzisa manje.

<sup>184</sup> Bonkhe labaMtsandzako, phakamissa sandla sakho. Utsi, "NgiyaMtsandza, nako konkhe—konkhe lokungekhatsi kwami." Akamangalisi Yena? Sisakhotsamise tinhloko tetfu,

emkhulekweni wekuvala nje... Khumbulani inkonzo kusasa ebusuku. Ngitoncela, i...

<sup>185</sup> Uma utokwenta manje, ngekushesha ngangoba kungenteka, ngamunye wenu lophakamisa sandla sakho sensindziso, uhamba edvute, kholwa kutsi unayo. Uma ungeke ukuve, tsatsa lomntfwana lobekiwe. Niyabona na? Chubeka utsi sewunaye kute kube ngulokungiko sibili.

<sup>186</sup> Wena lowemukele kuphiliswa, kepha awuva kwasamehluko; wena utsi, "Kukholwa kwami—kwami akucheneli kukunyakatisa khona manje, Mnaketfu Branham."

<sup>187</sup> Tsatsa indlela yemntfwana lobekiwe. Chubeka nje utsi, "Nkhosi, ngiphilisiwe. Ngiyakukholwa." Kutofika. Kutokulifola usesimeni lesikahle, uyabona, bese-ke kukholwa kwakho kutoba kahle. Litokutsatsa. Kukholwe nje ngayo yonkhe inhlitiyo yakho.

<sup>188</sup> Manje, kusasa ebusuku, tinkonzo titocala nasekugabence insimbi yesikhombisa, sikhatsi lesijwayelekile, kusasa ebusuku, futsi njalo ebusuku kuleliviki. Phumanu futsi nive uMnaketfu Neville nalaba labanye bafundisi, natsi sonkhe, ndzawonye, lotama kuveta imvuselelo. Nkulunkulu akubusise. Asikwati kukuletsa. Ufanele u—ufanele ukuletse kanye natsi, ngekukhuleka, kuta, ubekhona lapha. Nkulunkulu abe nawe.

<sup>189</sup> Manje, ngifisa kwangatsi benignakhona, ngekushesha nje lapho seyikhishiwe, ngekushesha ngangoba ningakhona, ku... ngaphandle kwalesakhiwo. Sicishe sibe nencenye yeli-awa lekulungiselela lapha kutsi kwentekе. Futsi lamanye emadvodza ayasebenta. Futsi sitokhotsamisa tinhloko tefu.

<sup>190</sup> Futsi ngiyakholwa kutsi ngive uMnaketfu Junie Jackson emuva etetsamelinu. Mnaketfu Junior, ngabe ukhona lapha kusihlwa? Umnaketfu lovela eNew Albany, ebandleni leMethodisti. Kulungile. Mnaketfu Jackson ungasikhulula ngelivi lemkhuleko?

[Umnaketfu Jackson ucalu kukhuleka. Akucoshwanga etheyiphini—Umhl.] ...?... lenitoba semshadweni, wotani ngaphambili masinyane khona manje.

<sup>191</sup> INkhosi inibusise. Sitonibona kusasa ebusuku.

Mntfwana welusizi newamaye;  
Litokunika injabulo nendvudvuto.



*IMIFANEKISO YAKHRISTU SSW59-0525*  
(Images Of Christ)

LoMlayeto ngeMnaketfu William Marrion Branham, kwekulala wetfulwa  
ngesiNgisi ngeMsombuluko kusihlwa, ngenyanga yeNkhwekhweti 25, 1959,  
eTabernakeli laBranham eJeffersonville, eIndiana, eU.S.A., utsatselwe  
ekucopheni kwetheyiphu lenamazibuthe futsi wakhicitwa ungakafinyetwa  
ngesiNgisi. Loku kuhunyushwa ngeSiSwati kwakhicitwa kwakhishwa yiVoice  
Of God Recordings.

SWATI

©2021 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)